

Hechos de los Apóstoles

Ɔnintaruz Kiarit Aizpa

San Lucas pinkih iztawane, Hechos, Ɔnintuz Kiarit Aizpa, pinkih, iz-tawa, San Lucas paasas pinkih parit akwa. San Lucasne Dios watsal pit para, awa Jesús kirit aizpa piankamat kit Jesucristora nijkulanapa. Kwiztane usne Hechos, Ɔnintuz Kiarit Aizpa, pinkih para, awa miza Jesússpa kammuruz uzara piankamanapa. Suasne Jesússpa kammuruzne wan pipuluwara iara, Dios watsal pit kainana, wan awa Jesucristora nijkulanapa. Dios Sinam Izpul usparuza kiwanninara akwa, paiña kammuruzne akkwan iztasparit kal kiara. Jerusalén pipulukis Jesússpa kammuruzne Judea surakas Samaria surakas Siria surakas iara, Dios Watsal pit kainana. Suasne San Pablone Asia suwarakas Macedonia suwarakas Roma pipulurakas piannara, wan awaruza Dios pit kamtana-na, Jesucristora nijkulturuz iglesiakin wanmakkanapa.

Hechos, Ɔnintuz Kiarit Aizpa, pinkihkin kutña pajte wa: (1) Jesucris-to chiyura nurachasmin, usne paiña kammuruza Dios pit kainanapa ininnat kit mamasa kailnash kaiznara (1.1-14). Cristora nijkulturuzne Jerusalén (1.15-83) pipulura wanmakkamtu, paiña iglesia namanapa. (2) Paiña kammuruzne Dios Watsal Pit Palestina suwara kainanamtu (8.4-12.25). (3) Kwiztane paiña kammuruzne Dios Watsal Pit Asia suwarakas Grecia suwarakas Roma pipulurakas iara, paiña pit kamtana-na. (a) An ñancha Pablone Chipre suwarakas Grecia suwarakas ira (13.1-14.28). (b) Pablone wan inintuzkasakas ilaparuzkasakas Jeru-salén pipulukin wanmakkara (15.1-35). (c) Suasne Pablone mamasa attishta Siria suwarakas Asia suwarakas Grecia suwarakas it kit Dios Watsal pit kainanara (15.36-18.22). (d) Kwiztane mamasa Pablone Asia suwarakas Grecia suwarakas it kit Dios Watsal Pit kainanara (18.23-21.16). (e) Minpa piji Jerusalén pipulukin kachira siptawane, Pablone, piztitmikakanain, Roma pipulura, Italia sukin, ira (21.17-28.31). Suas usne Dios Watsal pit wan awaruza kamtanara.

Diosne paiña Sinam Izpulta ininna namtu

1 Nane Lucas mun ish. Nua, Teófilora, kakishapu kiz kit an pinkih pamtus. An ñancha an pinkihta Jesús wan kit aizpakas us kamtanara aizpakas parau, Jesús chiyura numtu payukima. **2** Nurachasmin, usne paiña Sinam Izpulkasa paiña narit inintaruza kamtaninnara, us kamtara aizpa kianapa. **3** Irritas kaultawane, Jesúsne usparuza cuarenta payurakima, akkwan pijikima, izpannara, us uztu piankamanapa. Akkwan piji usparuza izpan kit Dios awaruza ininnashimtu kwinta kinara.

4 Mama uspakasa tuasmin, Jesúsne ininnat kit kaiznara:

—Jerusalén pipuluras iman. Suain tiriztain, ap Papihsh umiza kin namtit aizpa sappanakima. Nane sunpa uruza kaiznara. **5** Watcha Juanne uruza kwazikasain munnanara. Akkwan payuchin kawarain Sinam Izpulne uruza piznanazi.

Jesúsne chiyura numtu

6 Suasne kanpamtuzne Jesústa ka akkwan piji mimaara:

—Au Anpat, ¿An payura au Israel awara kiwainanakish, au sukin ininna? mimaara.

7 Usne usparuza ka sinkanaara:



Paas ángeltuz kammuruza kwinta kinamtu

—Uruzne an payu piankamamanazi. Au Taittain an payu naranit, us kishit aizpa kin. **8** Diosne paiña Sinam Izpulta ininnazi, u ussa sappanapa. Usne uruza tinta kiwainnanazi, na akwa kamtananapa. Suasne une Jerusalén pipulurakas wan Judea surakas Samaria surakas wan attish surakas ianazi, na akwa kainana.

9 Jesús sun kiztawane, awa izamtuasmin, Diosne ussa chiyura nuninta. Wanish at kit ussa pal kit sipta. Ussa an izarachi. **10** Jesús numtuasmin, uspane chiyura kwashpa izakkaara. Suasne paas ángelne putchã kamisha kwa usparuza at kit uspakasa kunpailta. **11** Usparuza kaiznara:

—Galilea suras awa, ¿Chikishmaka chiyura izakpuspas? An Jesúsmin uruztas nuritmikain watcha mamasa sunkanain maz payura kailnazi.

Uspane Matíasta naanara, Judaspa kal kinpa

12 Suasne uspane Olivos izakis kihshat kit Jerusalén pipulura kaiyarit. Moisés usparuza ininta aizpa kiashit akwa, uspane kwaizkulmu payura maza kilómetrokima kashain ishiana. **13** Pipulukin piannatpane, kwashtit yal pitmura nuarit.

Pedroka Juankas Santiagoka

Andréska Felipeka Tomáskas

Bartoloméka Mateoka Santiago Alfeowa painkulkas

Simón Celote munmikakas Judas Santiagowa aimpishkas usparuzpain pura.

14 Wan wanmakkara Jesúska aimpishkasa paiña akkuhsh, Maríakasa mamaz ashamparuzkasa, Diosta payu aizpa paikuana.

15 Sun payune Pedrone Cristora nijkulturuz paizkakin nil satkunta. Maza cien veintekasa awa purakin. Pedrone ka kaiznara: **16** “Cristora piantuz, mizhain. Diosne chiwazha paiña pinkihta panantit aizpa ka kirit. Sinam Izpulne Davidta Judaspa kwinta kininta. Usne an ñancha Judas kit aizpa kwinta kira. Usne Jesúska annara, awa ussa pizanapa. **17** Usne au izmumika azi. Aukasa kal kimika azi. **18** Kwiztane kwail kit akwa, Judasne pial sap kit sun pialkasa su paira. Usne kwashtas kizpuwara taiz kit irit. Paiña pija puzpian kit pirit puzta. **19** Jerusalénkin uztuz sun piankamarawane, uspane sun su i Acéldama munara. Usparuzpa pitne ‘aimpi su’ mun. **20** Sun wan kanta pinkihta ka parit:

‘Paiña kwairit yalta suane minminkas uzmuchí.’^a

Ankas ka parit:

‘Mamazne paiña kal kitpa.’^b

21-22 Katmizna aune minpazha aukasa wanmakmumikasha nanarawash. Wanmakmumikane awara ka kizshina: ‘Au Anpat Jesús irittas kakulta.’ Mama Jesús wan payu aukasa uzasmin, uskas aukasa wanmakta. Juan munnanakima, Jesús kakulnakima, usne aukasa chara.”

23 Suasne Dios pit piantuzne, wanmakmuruzne, paas awara nanara. Mazane paas mun muntit: José Barsabáskas Justokas. Mamazne Matías muntit. 24 Suasne uspane uspa Anpatta ka pai-kuara: “Nune miza wan awa minñamtu pian. Katmizna aumiza an paastas nu naritmikasha izninchain, 25 mamaz ininmikawa kal kinpa. Judasne sun kal chihkat kit us kwail akwa paiña miwara it kit naizta.”

26 Suasne uspane awa wanmakkarawane, wankis an watmikasha naara. Sunkanain uspane Matíasta naat kit once inintaruzkasa wianara.

Sinam Izpulne amtu

2 ¹ Sun Pentacostés pishta payu taizka, wan Cristora piantuzne mazakwain wanmakkarit. ² Azain chiwazha tinta az kit chiyuras taizta. Tinta inkwakanain pat kit wan yal ayukmal napta, awa uzkularitkin. ³ Suasne uspane ti ñ in aitzukanain izara. Sun ñ in paimpa paimpain naiyarit. ⁴ Sun akwa Sinam Izpulne wan awaruza piznara. Suasne uspane mamaz kamtachi pit kwinta kiamizta. Izpulne usparuza paraninnara.

⁵ Sun payura mamaz suras Judío awaruzne Jerusalén pipulura pianara, Diosta wakpuj wain kit Diosta paikwan. Uspane wan suras aara. ⁶ Sun aztu miarawane, akkwan awane wanmakkat kit iztaspaarit. Inintaruz kwinta kiamtuasmin, pakaish pakaish paiña pitmin miara. ⁷ Uspane ishkuat kit iztaspaat kit usparuzpain ka mimaara:

—¿An paramtuzne Galilea suras awa ki? ⁸ ¿Mizamakai? Mane auruzpain usparuza mipuspas. Uspane au pit pashpas kawira aizpa paramtu. ⁹ Apane awa purai:

^a 1.20 Sal 69.25 ^b 1.20 Sal 109.8

Partia suraskas Media suraskas
 Elam suraskas Mesopotamia suraskas
 Judea suraskas Capadocia suraskas
 Ponto suraskas Asia suraskas
 10 Frigia suraskas Panfilia suraskas
 Egipto suraskas Libia suraskas kashara Cirene pipulura
 Roma pipuluras awakas apain pura. 11 Minpazha usparuztas Judío awa azi. Mamaztuzne Judío awa namarit.

An awakas Creta suraskas Arabia suraskas purai.
 Uspa paraka, aune wan Diospa watsal kal kirit aizpa au pitmin mipuspas, kizara.

12 Wanne iztaspaat kit chi kizmanamara. Usparuzpain mi-maamizta:

—¿Chima kizshina sunne?

13 Mamaztuzne usparuza sun akwa ishanat kit ka kaizara:

—Uspane chappi kuat kit piarai, kizara.

Pedrone awaruza kaiznara

14 Suasne Pedrone mamaz once inintaruzkasa nil satkun kit tinta parat kit ka paiña Judío kwaltuza paranamizta: “Na kaiztu aizpa mizhain. Judío awaruzkas, wan Jerusalén pipulura uztuzkas, nawa wat mirain, piankamanapa. 15 Uspane pirachimai, umin minñamtukanain. Mama tilawain i. Nueve urain i. 16 Joelne, Dios pit kainammikane, an ñancha sun kit aizpa ka kaizta:

17 ‘Diosne sun minpa payura kaiztu.

Nane ap Izpul wan awara nail kit milanash.

U painkulkas pashukas nawa kwinta kianazi.

U musitturuzkas u ilaparuzkas kankizpaanazi.

18 Sun minpa payura nane ap Izpul,

ap kiwainmuruza ashamparuzakas ampuruzakas
 ininnat kit milanash.

Uspane nawa kwinta kianazi.

19 Nane kwashpa chiyumal chiwazha watsal kal kinash.

Nane uruza an izninnanash, piankamanapa.

Wan pailtĩmtuasmin, nane pilkin aimpikas ñnkas
 ishkas izninnanash.

20 Pãñne til parinazi.

Palapchane kwanam tilkwil aimpikanain namtinazi.

An kwiztane an watsal payu taizkane,
 au Anpatne paiña kal kimiznazi.

21 Minpazha Anpatta paikumtune,
 usne usparuza watsat milnanazi, ñnta ñamanpa.’^c

22 Pedrone sun paiña Judío kwaltuza kaizta: “Israel awa, na kaiztu aizpa mirain: Diosne Jesústa, Nazarettas munmikasha nat kit uruza ininnara, akkwan tuntu iztasparit kal u iztakin kinpa. 23 Diosmin Jesústa uruza chihkatchasmin, usne chiwazha kishimtu aizpa an ñancha pian. Suasne une kwail awaruz ussa ininnat kit kurishta iru patpian piantaninta. 24 Sunkana Diosne ussa irittas kakulninta. Jesúsne iritpa izpul imtura nukkulsachi, kajchira siptitmikakana. 25 Davidkas Jesúsna kwinta kit kit ka kaizta:

‘Nane ap Anpatta na iztukin iztau.

Usne ap makin uz, awa nawa ishkumanpa.

26 Katmizna ap kajichu watsal ish.

Mane watsal pit pararau ap pitkasa. Katmizna mane nakas Diosta tiriz kit wat kwaizkulnash.

27 Nune, ap Diosne, ap izpulta irittukin kwaimanazi.

Nune nawa, up kiwainmumikasha, pashit kit ap ñara pitninmanazi.

28 Nune nawa chiyura num mi kamtara, pailta payu uz-
 napa.

Nune nakasa uz, na wat tuanpa,’^d kizta.

29 Cristora piantuz mintain. Nane uruza Davidpa au irit Taitawa, nil kwinta kitpaish. Us irawane, uspane ussa kamara. Us kamkin aukasa kashain tu. 30 David uzasmin, usne Diospa kainammika azi. Uskas Dios sun kin namta aizpa pianazi. Diosne ussa ka sun kin namta: ‘Up kwalne, Cristo munmikane, sun su sapmilnazi, inninna.’^e 31 Sunkanain Davidne Dios kimtu aizpa ñamin piankam kit Cristo irittas kakulnazi ka kwinta kinara: ‘Paiña Izpulkas irittuz imtura nukkulmanazi. Paiña ñakas pitmanazi.’^f 32 Mane aune sunta izat kit uruza ka kizpuspas: ‘Diosne Jesústa irittas kakulninta.’ 33 Sunkana Diosne ussa nuninta, us uzkin ininna. Paiña papihshne, Diosne, paiña Sinam Izpul sun kin namtit aizpa Jesústa mlara. Jesúsne mamin sun wan

^c 2.21 Jl 2.28-32 ^d 2.28 Sal 16.8-11 ^e 2.30 Sal 132.11
^f 2.31 Sal 16.10

izara aizpakas wan miara aizpakas uruza izninnara. ³⁴Chiyura nurachikas, Davidmin Jesúska ka kaizta:

‘Ap Diosne ap Anpatta kaizta:

Na uzkin uzti, awa nua wat minñanapa.

³⁵Nane wan awaruza nu inintu aizpakas, nu kaiztu aizpakas kininnanash.’^g

³⁶Une, Israel awane, miat kit piankamtain. Nane Jesúska watcha kaiztus. Une Jesúska iru patpian piantaara. Diosne ussa Anpatkas Cristokas munta.”

³⁷Pedro kaizta aizpa miarawane, uspane uspa kaijchura kwail minñat kit Pedrorakas mamaz inintaruzakas mimara:

—Ap Israel kwal ¿Chima kianapai?

³⁸Suasne Pedrone sinkanara:

—Kwail kiarit aizpa maiztain. Dios iztakin pailtara munna-rain, Jesucristora kanpamtuz namanapa, Dios u kwail kiara aizpa mainninnanapa. Suas Diosne paiña Sinam Izpul uruza milananazi. ³⁹Diosne sun kin namnara aizpa uruzakas uspa pashparuzakas mamaz attishtas awaruzakas milananazi. Au Anpatkas au Dioskas wan awa narittuzakas akwarittuzakas sun milananazi.

⁴⁰Sunmin kwinta kinara. Pedrone an akkwan pitkasa kurunat kit paranat kit kaiznara:

—Diosta paikwarain, uruza watsat milnanapa, sun kwail awakasa naizamanpa.

⁴¹Pedro kaizta aizpa miraruzne munna iarit. Sun payura kutña mil awane, Dios inintamikasha, Cristora piantuzkasa wanmakkara. ⁴²Sun awaruzne inintaruz kamtanara aizpa miamiz kit sulmin uzat kit Diosta parejuin kwinta kiara. Uspane wanmakkara, usparuzpain kumira nail kit kwan.

Diosta piantuzne wanmaktit uzamtu

⁴³Wan awane iztaspaara, inintaruz iztasparit kal kiara akwa. Uspane watsal iztasparit kal kiat kit akkwan awara kiwanara, Diosta piankamanapa. ⁴⁴Wan Cristora nijkulturuzne wanmakkat kit chiwazha mij aizpa wanta naiyara. ⁴⁵Uspane chiwazha mij aizpa paininara, sun pial pailtara we mijtuza nailna. ⁴⁶Uspane pailta payura Diospa yalta wanmakkara. Uspa-

^g2.35 Sal 110.1

ruzpa wan yalta kumira nail kit kuat kit wat kulara. Uspane usparuza kwinñara. ⁴⁷Uspane ka kaizara: “Diosne kwisha wari.” Wan awane Dios pit piantuzpa minñat kit kaizara: “An awane kwisha wari.” Au Anpat Jesús awaruza watsat milnamtuasmin, usne Dios pit piantuza pailta payu wiannara, uspakasa wanmakkanapa.

Maza mitti chasachimika kakultu

3 ¹Mamaz payura Pedrokas Juankas Diospa katsa yalta kutña urara sulmin nuita, awa Diosta paikumkin. ²Maza ampune, mitti chasachimikane, ainkiasmin ka kawirit. Pailta payu suain tuara. Awane pailta payu ussa “watsal” muntit pijtakin miara, Diospa katsa yal napmukin chihti an kit amtuza pial paikwan. ³Pedrokas Juankas Diospa katsa yalta nappailmizkane, mitti chasachimikane usparuza iznat kit chihti an kit pial paikwanara. ⁴Suasne Pedrokas Juankas ussa izpailta. Pedrone ussa kaizta:

—Aumiza iznaka.

⁵Sun ampune usparuza iznat kit chiwazha milanazi minta.

⁶Pedrone ussa kaizta:

—Nane pialkas mijchish. Urukash mijchish. Na mij aizpa milanash. Jesucristone Nazaret pipuluras azi. Jesúsne nua kuhsinnazi, chanpa.



Pedrokas Juankas chasachimikara iztas

7 Suasne Pedrone paiña chihti numal piz kit kuhspaninta. Azain paiña pimpulkas mitti impulkas wat parit. 8 Suasne mitti chasachimikane masain tizak kit mittikin kun kit chamizta. An kwiztane usne tizak kit uspakasa chat kit Dios katsa yalta naptit, “Dios kwisha wari” kizna. 9 Wan awane us chat kit Diosta kwisha wari kiztu izara. 10 Uspane iztaspaat kit ishkuara, chasachimika chamtu akwa. Uspane ussa impara imparain piankamamizta. An chasachimikane an ñancha Diospa katsa yalkin “watsal” muntit pijtakin tuazi, chihti an kit pial paikwan.

Pedrone Diospa katsa yalkin paranamtu

11 Chasachimika Pedrorakas Juantakas chihkashitchiasmin, wan awane iztaspaat kit Diospa katsa yalta azain iara, Salomón pijta muntitkin wanmakna. 12 Sun iztawane, Pedrone awara ka mīmanara: “Au Israel awa kwal, ¿Chikishma iztaspaupas? ¿Chikishma aumiza kwisha izpuspas? Au paasne sun ampura au pit akwa wat panintachi. Aune ussa chanintachimakpas, au paasmin Diosta pian akwa. 13 Sunkanachi. Diosne sun kirit, awa ‘paiña painkul Jesús tinta namtire’ kizanapa. Abrahamkas Isaackas Jacobkas an Diosta wakpuj wainñat kit paikuara.^h An Diosne au an ñancha iritpa kwalpa Dios i. Une ussa Judío inintuza chihkaara. Pilato Jesússta chihshimtuasmin, une Jesússta pashitchimakpas kizara. 14 Une Dios sinammikashakas nil uzumikashakas chihashitchi. Une maza awara, piantatmikasha, chihshiara. 15 Sunkana une awaruza uzninmumikasha piantaa-ra. Mane Diosne ussa irittas kakulninta. Aune uruza sun piankamninnat kit kainanamtumakpas. 16 Jesússta nijkultit akwa, an ampune wat parit. Une ussa izat kit pian. Jesússta nijkultit akwa, an ampune kapal wat parit. Wan awane sun izamtu.

17 Sunkana ap Israel awa izmuruz, mirain. Ukas u ininmuruzkas ussa piantaaritkas, une u kiarit aizpa wat piankamara-chi. 18 An ñancha Diospa kainammturuzne ka kizara: ‘Jesucristone naiznatkin. Sunkanain Diosne sun kirit.’ 19 Katmizna u kwail kimtu aizpa maiztain. Diostain kailtain, u kwail kiarit aizpa sinam kwizninnanpa. Sunkanane au Anpat Diosne chiyuras anazi, auruza izpulta kiwain kit kwaizkulninnapa. 20 Ankas Diosne Jesucristora an ñancha naramikasha uruza ininnara.

^h 3.13 Éx 3.6, 15

21 Mane Jesucristone chiyura nukkultawa, Dios wan chiwalta masas namtanakima. An ñancha Dios pit kainammtuzne sunpa kainanara. 22 Sunkana Moisésne au irit kwalta ka kaiznara: ‘U Anpat Diosne maza kainammikasha, u kwaltas kawinintamikasha, nakana innnazi. Wan us kaiznara aizpa miarawa.ⁱ 23 Minminkas an kainammika kaizta aizpa miarakine, Diosne usparuza paiña kwaltas paimpa innnanazi, ianapa.’^j

24 Sunkana Samuel uzasmin, pailta kainammtuzkas kawarain an payu chi kirinsa kiz kit kainaara. 25 Une kainammtuzpa painkul mai. Diosne kainammtuz akwa uruza kaiznara, an ñancha kin namtit aizpa sappanapa. U an ñancha kwal uzasmin, Diosne Abrahamta ka kizta: ‘Nane up kwaltuza kiwainanash, wan awa an sukin uztuza wat kianapa.’^k 26 Paiña painkulta kakulnintawane, Diosne ussa an ñancha ininta, uruza wat kiwainanapa. Usne uruza wat kinara, awa kwail kiarit aizpa maizanapa, wan awa kwail kiamanpa.”

Pedrokas Juankas Judíowa inintuzakin kunpailtu

4 ¹ Pedrokas Juankas wan awaruza paranamtuasmin, Judío awawa pariyaruzkas Diospa katsa yal izmu policíakas Saduceo awaruzkas aara. ² Uspane aliz kulaarit, uspa paas awaruza kamtanara akwa. Ka kaiznara: “Jesús irittas kakulta akwa, awakas irittas kakulanazi.” ³ Katmizna uspane usparuza piznat kit



Suldaruruz Pedrorakas Juantakas pizanttu

ⁱ 3.22 Dt 18.15-16 ^j 3.23 Lv 23.29; Dt 18.15, 18-19

^k 3.25 Gn 22.18; 26.4

nashtimtura kajchira sipnarit tilawakima. ⁴Akkwan awane, usparuztas sun pit miraruzne, miat kit wat nijkulara. Dios pit miraruza wiantawane, uspane cinco mil ampu panapain wianta.

⁵Tilawara kwizta Judío awa inintuzkas ilapa inintuzkas Moisés kaizta aizpa kamtamtuzkas Jerusalén pipulura wanmakara. ⁶Anásne, pariyaruza ininmikane, tuara. Uskas Caifáskasa Juankasa Alejandrokasa wan pariyawa inintuz kwalkasa wanmakkara. ⁷Suasne uspane Pedrorakas Juantakas kanapa ininat kit “Paizkakin kuntain” kiznara. Uspane ka mimanara:

—Nune an chasachimikasha ¿Mizama kuhsninzi? ¿Minma uruza sun kin ininzi?

⁸Suasne Diospa Sinam Izpul ussa kiwaintuasmin, Pedrone usparuza ka kiznara:

—Judío awa inintuzkas ilapa inintuzkas mirain. ⁹An ishtumikane kuhsak kit chamizta. Une aumiza “¿Minma ussa kuh-sakninta?” kiz kit mimaamtu. ¹⁰Au paasne uruza, wan Israel awaruza, kainammpuspas, us wat parit kit miza tuntu kuhsaktit piankamanapa. Jesúsne, Nazaret pipuluras mikane, ussa kuh-sakninta. Une ussain iru patpian kit piantaara. Diosne ussa iritas kakulninta. ¹¹An ñancha Diospa pit ka parit:

“Jesúsne sam saktikana i. Une, yal samtuzkana, ussa kwayarit, ussa paashitchi akwa.

U ussa paashitchikas, usne awaruza watsat milnanashina.”^l

¹²Mamaztuzne, minminkas, aumiza watsat milnasachi. Diosne Jesústa ininta, aumiza watsat milnanapa. Apain mamazta inintachi.

¹³Wanmakmuruzne iztaspaarit, Pedrokas Juankas ishwatchin paranara akwa. Uspa paas kammu pianchi minñara. Kain awain minñara. Suasne uspane Jesúska chamtu nijkulara. ¹⁴An ampu, kakultitmika, sua uspakasa pana izamtu akwa, uspane chinkas sinkaarachi. ¹⁵Suasne uspane uspa paasta wanmakmukis ininnat kit nukkulat kit usparuzpain kwinta kiara. ¹⁶Ka usparuzpain kaizara:

—¿Chima kianapai Pedrokasa Juankasa? Wan Jerusalén pipulu uztuzne sun kwisha iztasparit kal kirit pian. Aune sun kirit aizpa kwail i kaizsachimakpas. ¹⁷Mane usparuza kurunat kit

^l4.11 Sal 118.22



Inintaruz awaruza wat paninnamtu

tinta kinarawamakpas, an akkwan awa sun miamanpa, mi-nainkas Jesús pa kwinta kiamanpa.

18 Suasne Pedrorakas Juantakas akwanat kit uspa pit ininnat kit kaiznara:

—Jesús pa kwinta kiaman; kamtanaman. 19 Pedrokas Juan-kas sinkaailta:

—Une minñarawa. U aumiza “Jesús pa kamtanaman” kaiz-
amtukas, aune Diosta mirawamakpas. 20 Aune izta aizpakas mi-
ra aizpakas kwinta kimiztawamakpas.

21 An akkwan aliz pit pararawane, uspane usparuza chihkaa-
rit. Uspane usparuza ilmanamara, pailta awa Diosta kwisha wa-
ri kizara akwa, sun kit akwa. 22 Mamasa kuhsaktitmikane cua-
renta año mijara.

Diosta piantuzne Diosta paikuumtu

23 Chihtawane, Pedrokas Juankas uspa izmuruza ñil kit Judío
awa ininturuzkas ñlapa ininturuzkas kaizara aizpa kainanara.
24 Sun miarawane, wanne sulmin Diosta paikuat kit kaizara:
“Au Anpat, nune sukas chiyukas pikas wan chiwalkas sara.
25 Nune Davidpa au kwalta kwinta kinara. Sinam Izpulne Da-
vidta, Dios kiwainmikasha, ka paraninnara:

‘Diosta nijkultuchiruzne waya kiamtu.

¿Judío awaruzne uspa kiashimtu aizpa kain minñamtu?

26 Au sukin inintuzkas wan p̄p̄ulukin inintuzkas wan-makkamtu,

Anpattakas Dios narittuzakas waya kianapa.’^m

27 Watcha. Herodeskas Poncio Pilatokas Judío awachikasa Israel awakasa an p̄p̄ulukin up sinam kiwainmikasha waya kin wanmakkara. Jesúsne Dios naramika i. 28 Uspa sun kiarachasmin, nune an ñancha uspa minñara aizpa pian, nu mintu aizpa kianapa. 29 Maneme au Anpat, usparuz miri. Uspane aumiza naizninanazi kizamtu. Aumiza kiwainchain, au ishkuamanpa, up pit kwinta kiana. 30 Nu tinta akwa, u kanpamturuza kiwainarain, ishturuza kakulninnanapa. U kiwainmuruzne up painkulta, sinam Jesústa, paikuanazi. Usparuz kiwaintain, chiwazha watsal iztasparit kal kianapa,” kizara.

31 Diosta paikuarawane, uspa uzamtukin ulmizta. Sun urain Diospa Sinam Izpulne usparuz piznat kit Dios pit wan mirakin kainana kiwainnara.

Uspane wan mij aizpa wantuza naiyara

32 Akkwan Cristora nijkulturuzne kawarain minñat kit sulmin kal kishiara. Minminkas chiwazha mij aizpa uspain watsarachi. Sunkana wanne chiwazha mij aizpa usparuz milanara. 33 Inintaruzne Anpat Jesús irittas kakultit kwisha tinta kainanamizta. Diosne wanta an akkwan kiwainnamizta. 34 Minminkas we mijchi. Su mijtuzkas yal mijtuzkas painin kit pial karaat 35 kit inintaruza milanara. Uspane an pial we mijtuza nailnara. 36 Sunkana Joséne Levíwa kwal kirit. Usne Chipre pi paizka sukin kawira. Inintaruzne Joséwa mun maiz kit Bernabé munta, (us mamaztuza watsal pit kiz kit kiwainamtu akwa). 37 Sun ampune maza su painin kit inintaruza milanara, mamaztuza kiwainanapa.

Ananíaskas Safirakas

5 ¹ Mamaz ampune, Ananías muntitmikane, sua uzta. Usne paiña ashampakasa chiwazha su mij aizpa paininpailta. Paiña ashampane Safira muntit. ² An ampune paiña ashampakasa

^m 4.26 Sal 2.1-2

pitchin pial paimpa mijkultit. “Wan pial milarau” kiztuasmin, usne tiztit mij aizpa inintaruza karara. Kainmin usparuza kishinara. Sinam Izipulne Ananías kit aizpa Pedrora piankamninta. 3 Suasne Pedrone ussa ka kaizta:

—Satanásne nua piz kit napta, Sinam Izpulta piraíl kaiznina. Nune sun kishira, sun su paininta pial chiwazha watsan. 4 Sun su painintachasmin, up azi. Sun su painintawane, an pial up azi. ¿Chikishma sun kimtus? Nune Diosta piraíl kaizta. Awara chi, kizta.

5 Sun mirawane, Ananíasne nain kit ira. Wanne sunta piankamara aizpa ishkuara. 6 Suasne musitturuzne nappat kit ussa pīn ippat kit muara, pilta kamna.

7 Kutña ura pailtawane, Ananíaspa ashampane Pedro tugin napta. Usne paiña ampura kirit aizpa pianchi. 8 Pedrone ussa mimara:

—Kaizcha. ¿Une supawakin sun su paininmanas?

Usne ka kizta:

—Watcha. Sunpawa muin.

9 Suasne Pedrone ussa kaizta:

—Une nijkulara, Dios Izpulta piraíl kaizna. ¿Chikishma sun kiwiznash? Up ampura mut kamtaruzne me aamtu. Uspane sunkanain nua muanazi, pilta kamna.

10 Sun urain usne Pedro panakin nain kit ira. Musitturuz nappakane, ussa irit wanmalara. Uspane ussa ampu kamkin kamna iara. 11 Wan Jesústa piantuzkas wan sunpa piankamtuzkas ishkuara.

Inintaruzne akkwantuza kakulninnamtu

12 Inintaruzne awa purakin watsal iztasparit kal kiat kit kwisha akkwan awara kakulninñara. Wanne Salomón muntit pijtakin wanmakkara. 13 Awa usparuza wat minñat kit wat awa mai kizarakas, minminkas uspakasa wanmakshiarachi. 14 Mazantuz ishkuarit akwa, akkwan ampukas ashampakas Anpatta nijkulat kit Anpatta piantuza wanmakkara. 15 Sun akwa awane ishturuza pianamal karaat kit mikin kamakinkas pīnkinkas taara. Pedro miwara pīntuasmin, paiña izpul chamtukin usparuza isalta pinnara. 16 Akkwan awane kasha pipulukis Jerusalén pipulura pianaara. Uspane ishturuzakas saliz piztittuzakas karaara. Wanne kakularit.

Judío awane Pedrorakas Juantakas pizashimtu

17Pariya ininmikakas Saduceo izmuruzkas inintaruza aliz kulaara, awa usparuza pashinamtu akwa. 18Suasne uspane paas inintaruza pizat kit kajchira sippara. 19Anpatpa ángelne amtawara at kit kajchi pįjta chih kit usparuza puzninnat kit kaiznara: 20“Katsa Diospa yalta irain. Suain wan awara Jesús awaruza uzninnamtu kainarain.” 21Sun miiltawane, tilawain katsa Dios yalta nap kit awaruza kamtanamizta.

Katsa pariyakas paiña izmuruzkas wan Israel ilapa inintuza akwanara, wanmakkana. Uspane usparuza kajchiras kanapa ininñara. 22Policía kajchira pianakane, kajchira usparuza wanmalnarachi. Suasne kaiyat kit usparuza 23ka kainanara:

—Piannakane, aune sun kajchi sam siptit wanmalwiznash. Policíakakas pįjta kin wat izappara. Pįjta chihtkane, aune minainkas ayukmal izkitchimakpas.

24Sun miarawane, katsa Diospa yal izmu policía ininmikakas katsa pariyaruzkas chi kirit aizpa pianchi. Usparuzpain chima kiarizi mimaara. 25Sun urain maza ampune at kit kaiznara:



Ángel inintaruza kajchiras chihtnamtu

—Mirain. Sun paas ampune, u kajchira siptittuzne, Dios katsa yalta paizkakin uz kit awara kamtanamtu.

26 Suasne Diospa katsa yalta policíane mamaz policíakasa iat kit usparuza karaara. Awaruza ishkuamtu akwa, uspane usparuza kwail kiarachi, awa usparuza uk kiamanpa. 27 Karaarawane, policíane usparuza Israel ilapa inintuz wanmaktitkin kunninara. Katsa pariyaane kaiznara:

28—Aune uruza Jesús pa kamtanachi inintamakpas. ¿Chi kiarit une? Une wan Jerusalén pipulukin uzturuza kamtanamtu. Une aumiza sun ampura piantaamakpas kizshiamtu.

29 Suasne Pedrokas mamaz inintaruzkas sinkaanara:

—Diosta mirawamakpas. Awara mirakiwamakpas. 30 Au Diosne, au kwalpa Diosne, Jesús ta irittas kakulninta. Une ussa irukasa patpian kit tira kan kit piantaara. 31 Diosne ussa kakulnin kit tinta namninta. Usne ussa ininmikakas au watsat milmumikakas namnintit, u Israel awa kwail kiarit aizpa maizanapa, u kwail kiarit sinam kulnanapa. 32 Aune uruza Dios kit aizpa kainapuspas. Diosne paiña Sinam Izpul akwa aumiza piankamninarara. Usne paiña Izpulta paiña pit miraruza ininamtu.

33 Sun miarawane, uspane pilchapuzat kit usparuza piantashiara. 34 Gamalielne wanmakmuruztas azi. Usne Fariseo awa azi. Usne Moisés kaizta aizpa kamtanara. Wan awane us kwisha wat kirit minñara. Usne kun kit inintuza pianamal irattukimain ininnara. 35 Kwiztane usne wanmakmuruzta kaiznara: “Israel awa mirain. An ampuruza u kiashimtu aizpa mamasa wat mintain. 36 Teudaspa nijkultain. Akkwan payuchin usne at kit ‘nane wat awa ish’ kiznara. Suas ampara cien awane ussa kanpaara. Minpazha ussa piantarawane, paiña kanpamtuzne wan kaarit. 37 An kwiztane awara wiantu payuin Judasne Galilea suras azi. Akkwanne ussa kanpaara, gobiernokasa waya kin. Awa ussa piantaarawane, paiña kanpamtuzne wan kaarit. 38 Katmizna nane uruza ka kurunamtu: Usparuza chinkas kiman. Usparuza chihttain. Awa mintu aizpakas awa kal kimtu aizpakas paitinazi. 39 Us pa Dios kaizta aizpa kiamtune, une usparuza kwayasachi. Dioskasa waya kiman, kiznara.”

Uspane Gamaliel usparuza kainara aizpa kiara. 40 Suasne uspane inintaruza akwanara. Usparuza ilnarawane, uspane Jesús pa kwinta kiman kiznara. An kwiztane chihtnarit. 41 Inintaruzne Israel inintuz wanmakmukis puzpail kit watsal kulpailta, Je-

sús akwa naizpailta akwa. ⁴²Uspane Diospa katsa yaltakas wan yaltakas Dios watsal pit kamtamizta. Jesús pa, Dios ininmikawa, pailta payukima kwinta kiamizta.

Siete awaruza nanarit

6 ¹Payu aizpa kwisha akkwan awane Jesús pa nijkulamizta. Griego pit paramtuzne aliz kulaat kit Judío pit paramtuza kaiznara: “Une au ashampawa ampu irittuza kumira kawarain nailnarachi.” ²Suasne doce inintaruzne wan Jesús pa piankamturuza wanmakninnat kit kaiznara: “Aune Dios pit kainammiztawamakpas. Dios pit chihkarachiwamakpas, kumira nailna. ³Katmizna, ap Diosta piantuz mizhain. Siete ampuruza sairain. Wat mintuza, wat piantuza, sairain. Sinam Izpul piztittuza sairain. Usparuza sun kal kinpa chihkarain. ⁴Aune Diosta paikwat kit Dios pit awaruza kamtawamakpas,” kiznara.

⁵Wanne sun nijkultat kit awara nanara. Estebanne wat nijkulta. Sinam Izpulne ussa pizta. Felipekas Prócorokas Nicanorkas Timónkas Parmenaskas naarit. Nicoláskas naarit. Usne an ñamin Antioquía suras at kit Judío awakana namtit. ⁶An kwiztane uspane usparuza inintaruz purakin karanara. Inintaruzne uspa akwa Diosta paikuat kit uspa chihti usparuza paanara, sun kal kianapa.

⁷An akkwan awane Dios pit piankamamizta. Jesús ta piantuzne Jerusalén pipulura wanmakkamizta. Akkwan Judío pariyaruzkas Dios pit piankamat kit Jesús ta nijkulamizta.

Uspane Estebanta pizamtu

⁸Estebanne irittuza kakulninnara. Ishturuza wat paninnara. Saliz piztittuza puzninnara. Iztasparit kal kimizta, awa Diosta piankamanapa. Diosne ussa nat kit tinta kiwainta, awa iztakin paiña iztasparit kal kinpa. ⁹Suasne minpazha Judío kammu yaltas Estebanta tinta mimaamizta. An kammu yalne chihmtumikawa kammu yal muntit. Uspakas Cirene pipuluras awakas Alejandría pipuluras awakas Cilicia pipuluras awakas Asia suras awakas sua wanmakkara. Sun ampuruzne Estebanta tinta kwinta kiamizta. ¹⁰Sinam Izpulne Estebanta kiwainta, usparuza nil kwinta kinpa. Uspane ussa wat sinkaarachi. ¹¹Suasne uspane minpazhara pial tanara, pirail kaizanapa. “Aune uspa kaizara aizpa miramakpas. Usne Moisés pakas Dios pakas kwail pit kwint-

ta kira.” Sunkana kiztain. ¹²Sunkana awakas ilapa inintuzkas Moisés kaizta aizpa kamtamtuzkas Estebanta pilchapuzamizta. Uspane ussa azain iat kit pizat kit ilapa inintuzpa wanmaktitkin milara. ¹³Uspane pirail kaizmuruza sayara, sunkana pirail kaizanapa: “An ampune Diospa sinam yalkas Moisés ininta aizpakas kwail pit kwinta kimiztu. ¹⁴Aune Jesús Nazaret pipuluras kaizta aizpa miramakpas. ‘Nane Diospa katsa yalta azpiannash,’ kizta. ‘Nane Moisés ininta aizpa maiznash, mamaz tuntu uzanpa,’ kizta. Sun miramakpas,” kizara.

¹⁵Suasne inintuzkas sua wan uztuzkas Estebanta izara. Ussa izamtuasmin, uspane paiña naztam matsihta izara. Ángel mat-sihkanain iztit izara.

Estebane kwinta kinamiztu

7 ¹Suasne katsa pariyane Estebanta ka mimara: “¿Nawa uspa kaizara aizpa watcha ki?” mimara. ²Usne usparuza ka sinkanara: “Au aimpihstuzkas au Israel awaruza ininmuruzkas nawa mizhain. An ñamin au taitta Abrahamne Mesopotamia sura uzta. Abraham Harán sura uztachasmin, au chiyuras Diosne ussa izpan kit ³kaizta: ‘Up sukas up kwalkas chihkat kit mamaz sura na antu aizpa inka.’ⁿ ⁴Suasne Abrahamne Caldea suras puz kit Harán sura uzna irit. Paiña papihsh irawane, Diosne ussa an sukin ma u uzkin karara. ⁵Usne apain chinkas su ussa milatchi. Minta uzna milatchi. Diosne an su milanash kizta.^o Nu irika, paiña painkultuzne an su sappanazi kizta. Sun payune Abrahamne painkul mijchiazi. ⁶Anpane sun urain Diosne ‘up kwal mamazpa sura mamaz awakanain uzanazi’ kaizta. Kiwainmumikakana cuatro cientos añokima kal kianazi. Katsa mikwaruzne usparuza ilnanazi, kal kianapa. ⁷Diosne ussa an kaizta: ‘Nane uruza naiznintuza ilnat kit naizninanash. An suras puzarawane, uspane apain nawa kiwainat kit nawa paikuanazi,’^p kizta. ⁸Diosne Abrahamkasa sun kin nam kit ka ininta: ‘Nawa nijkultuasmin, nune up aya tit kit circuncisión kitpa.’ Katmizna Isaac kawirawane, Abrahamne maza domingora paiña painkulpa ayara tit kit circuncisión kira. Sunkanain Isaacne Jacobta paiña painkulta kira. Jacobkas sunkanain paiña painkultuza kinara. Uspane au doce Israel pamparuz mai.

ⁿ7.3 Gn 12.1 ^o7.5 Gn 17.8; 48.4 ^p7.7 Gn 15.13-14; Éx 3.12

9 Au Jacobpa painkultuzne au pampawa irit kwal mai. Uspa Joséra aliz kulat kit izashitchi akwa, uspane ussa mamaz awaruza paininñara, Egipto sura milnapa. 10 Diosne ussa kiwain kit wan kwailtas puzninta. Joséne piankam kit Faraónpa izmumika namta. An katsa mikwane Egipto sukin ininta. Usne Joséra nara, Egipto surakas paiñain yaltakas ininnapa.

11 Suasne Egipto surakas Canaán surakas kumira wachi akwa, awane yak kiak kit naizara. Suane au ñamin papihshtuzne chi kumanamara. 12 Jacob chara pippa Egipto sura wa mirawane, usne paiña painkultuza, au an ñancha kwal uzturuza, ininara. 13 Uspa paakima iarawane, Joséne paiña aimpishstuza ussain piankamninta. Sunkanain Faraónne, Egiptokin katsa mikwane, Joséwa kwal piankamta. 14 Suasne Joséne papihshtakas paiña kwaltakas kanapa ininnara. Paiña kwal setenta y cinco awa wiantit. 15 Sunkanain Jacobkas paiña kwalkas Egipto sura uzna iarit. Uskas au an ñancha kwalkas ta iarit. 16 An kwiztane uspa kwaltuzne uspa iarit kwaltuza Siquem pipulura muat kit kamara. An ñancha Abrahamne sun awa irit kamkin Siquem su paira. Hamorne Abrahamta sunpawa muin sun su paininta.

17 An ñamin Diosne Abrahamta sun su milan namta, sun su sapnapa. Sun payu taiznapain pakane, Israel awane Egipto sukin an akkwan namara. 18 Suasne mamaz mikwane, Joséra pianchimikane, Egipto sukin ininmizta.^q 19 An mikwane au kwalta kain kinat kit naizninnara. Usne au kwalta ininnara, uspa mamin kawira pashaparuza pianamal talaij inanapa, sua iarimpa. 20 An payune Moisésne kawira. An pashpane kwisha watsal azi. Paiña papihshtuzne uspa yalkin kutña mishkima kawirara. 21 Kutña mish pailtawane, uspane Moisésta yal pianamal talaij inpa ininta. Faraónpa, Egipto mikwawa pashune ussa chak kit paiña painkulkanain kawirara. 22 Katmizna uspane Moisésta Egipto awa pian aizpa kamtaninta. Usne kwisha tinta awa namta. Paramtune, usne watsal kaizta. Chiwazha kal kitne, usne watsal kira.

23 Cuarenta año kawirawane, Moisésne min kit paiña Israel kwalta kwinta kin ishira. 24 Suasne usne maza Egipto awa paiña kwalta kwail kimtu izta. Katmizna Moisésne paiña kwalta pakpana ira. Usne Egipto awara il kit piantara. 25 Usne us kit aizpa

^q7.18 Éx 1.7-8

paíña Israel aimpíhshtuz mianazi minta. Uspáne Dios Moisésáta usparuzá kiwainna narit pianchi. ²⁶Tilawara Moisésne paas Israel awa waya kimtu iznat kit kiwainashira, waya kimanpa. Usne usparuzá kaiznara: ‘Une aimpíhshparain i. ¿Chikishma uwarain kwail kimtuas?’ ²⁷Suasne izmumikasha kwail kimtuatmikane Moisésáta makin nuppain kit mímara: ‘¿Minma nua au ininmikakana namzi? ¿Minma nua au mikwa namzi, au kwail kirit aizpa kiznapa?’ ²⁸Nune anchik Egipto awara piantara. ¿Nawakas piantashimtukish?’^r ²⁹Sun mirawane, Moisésne ishkwat kit Madián sura ira. Suane mamaz awakanain uz kit paas painkul kawirara.

³⁰Moisésne pul sukin, kashara Sinaí izakin, uzta. Cuarenta año pailkane, maza ángelne ussa pu tira ñn aitzukin izpanta.^s ³¹Moisésne us izta aizpa iztasparit. Tira an wat izna itpane, Moisésne Anpat Dios kaizka mira. ³²Ka kaizta: ‘Nane up kwalpa Dios ish. Abrahamkas Isaackas Jacobkas na iztakin wakpuj wainñat kit paikuara.’ Suasne Moisésne ishkwat kit ulmizta. Sunta izshitchi.^t ³³Anpat Diosne ussa kaizta: ‘Up zapato ukti. Sun su mitti kultukinne ap su i.’^u ³⁴Nane ap awa Egipto sukin kwisha naizamtu pianish. Nane uspa azamtu aizpa minat kit chiyuras kihshtau, usparuzá chihtnana. Nawa mizha. Nane nua Egipto sura ñinnash,^v kizta.

**¿Minma nua ininmika namninchi? ¿Minma au mikwa
namninchi, au kwail kirit aizpa kiznapa?**

³⁵Israel awa Moisésáta izashitchi kizarakas, Diosne Moisésáta ángelpara pu ti ñn aitzukin kwinta kit kit uspa ininmikakas uspa chihtmumikakas namta. ³⁶Moisésmin au kwaltuza Egipto suras ukkat mīlnara. Dios ussa kiwainta akwa, usne Egipto surakas kwanam pimarakas pul surakas cuarenta añokima iztasparit kal kiara, uspa Diosta piankamanapa. ³⁷Moisésmin Israel awara kaiznara: ‘Diosne maza ininmikasha paíña kwaltas ñinnazi, na ñintukana ñinnapa. Ussa mirain.’^w ³⁸Israel awa pul sukin wanmakkamtuasmin, Moisésne uspakasa uz kit ángelkasa Sinaí izara kwinta kira. Suasne usne sun Dios watsal pit mira, aumiza sun pitmin kamtanana.

^r7.28 Éx 2.14 ^s7.30 Éx 3.2 ^t7.32 Éx 3.6 ^u7.33 Éx 3.5
^v7.34 Éx 3.7-8, 10 ^w7.37 Dt 18.15

39 Au an ñancha kwalne Dios kaizta aizpa miashitchi. Ussa izashitchi akwa, uspane Egipto surain kaiyashira. 40 Suasne uspane Aaróna paikwat kit kaizara: ‘Nune mamaz dios sari, au iz-takin an ñancha inpa. Moisés aumiza Egipto suras milnarakas, aune ussa chima kirit pianchimakpas.’^x 41 Suasne uspane chiwazha wakara pashpakana iztit saara. Pishta saat kit wakara piantat kit wakara pashpakana kunkin chiwazha milaara, sunta wakpuj wainñanapa. Uspa sarit aizpa wari minñara. 42 Katmizna Diosne usparuza paimpa chihkanara, chiyu kimara wakpuj wainñanapa. Sunkana Dios kainammikane pínkihta ka parit: ‘Israel awa mirain.

Pul sukin cuarenta añokima uzasmin, une na akwa wakara piantarachi. Nawa chinkas milaarachi.

43 Sunkana nawa wakara milarachikas, une dios Molocpa yal ukasa muara, sunta wakpuj wainñanapa.

Ukas dios Refánpa kimakas muara, sunta wakpuj wainñanapa.

Umin suntuz sat kit wakpuj wainñara.

Katmizna nane u suras uknanash,^y Babilonia sura ininnanapa.

44 Au an ñancha kwalne pul sukin mamaz ainki Dios yal mijara, awa Dios uztu piankamanapa. Diosne Moisésta ininta, painña ainki yal sanapa. Usne ussa an ainki yalkana izninta. Sun Dios yal sarawane, 45 au kwalne sun Dios yal sabbat kit uspakasa milaara. An kwiztane au sura kaiyamiztune, au kwalne Josuékasa sun ainki yal karaara, uspa su nappamtukin. Mamaz awa sun sura uzarakas, Diosne sun sukis usparuza attishta ininnara. Diosne usparuza sun suras ininnara, au kwal sun su sappanapa. Sun ainki Dios yalne sun sukin nukkulta, David uzta payukima. 46 Au katsa ininmika David nil uzta akwa, Diosne ussa wat pashira. Usne Diosta paikwara, Diospa yal sashimtu akwa. Sua Jacobpa Diosne uzshira. Sua Israel awaruzne au Diosta wakpuj wainñat kit paikuashira. 47 Kwiztane Salomónmin Dios yal sara. 48 Au katsa Diosne awa sara yalkin uztuchi. Dios pit kainammikane Dios kaizta aizpa ka kaizta:

49 ‘Nane chiyuras na wan sara aizpa ininnamtus.

An sune na sara aizpa ainki i.’

^x7.40 Éx 32.1 ^y7.43 Am 5.25-27

Anpatne ka mimanara:

‘¿Chi yalma saanapas apane?

¿Mintama kwaizkulna inpai?

50 Nain wan sashit aizpa sarau.’^z

51 Une Dios kaizta aizpa nijkulamtuchi. Une Diosta pianchiruzkana mai. Une Dios kaizta aizpa miarachi. Une Dios Izpul kaizta aizpa miashitchi. Une u an ña kwal uztakanain uzamtu. 52 U an ña kwalne wan Dios kainammtuza naizninñara. Mamaztuzne Dios nil kimtumika anazi kizara. Uspane sun kainammtuza piantaara. Mane me une sun wat kimtumikasha kwail kiat kit kwail awara chihkat kit piantaara. 53 Diosne ángeltuza innnara, Moisés paiña pit uruza kwinta kinpa. Une sun pit miashitchi.”

Estebanne imtu

54 Sun miarawane, uspane pilchapuzaat kit Estebanta aliz pit paraara. 55 Sinam Izpul ussa piztuasmin, Estebanne chiyura izak kit Diosta naztamkana iztit izta. Usne Jesús pana Dios ininmakin izta. 56 Suasne Estebanne ka kaizta:

—Iztain. Nane chiyura kai iztus. Nane Dios Painkulta Diospa mamin inintukin iztus, kizta.



Estebanta uk kiamtu; Saulo ussa iztu

^z7.50 Is 66.1-2

57 Uspane kail palpizat kit tinta kwiannat kit masain wan ussa pizshiara. 58 Pìpulukis ussa ukkat kit uk kiamizta, piantana. Uk kiamtuzne, ussa kwail kirit kainammtuzne, uspa kamisha musittu panakin taara. An musittune Saulo mun.

59 Uspa ussa uk kiamiztuasmin, Estebanne Diosta paikwat kit kaizta: “Ap Anpat Jesús, ap izpul sapti.”

60 Kwiztane Estebanne wakpuj wain kit tinta ka kwianta: “Ap Anpat. Uspa kwail kiara aizpa sinam kwizninnari.”

Sun kiztawane, ira.

8 1 Saulone ussa piantana nijkulta. Saulone sun payuin Jerusalén pìpulukin wan Cristora piantuza kwisha naizninarana. Sun aliz awaruz akwa, wan Cristora piantuzne Judea surakimakas Samaria surakimakas iara. Inintaruzpain suain nukkulara.

Saulone Diosta piantuza naizninnamtu

2 Minpazha awane, Diosta piantuzne, Estebanta kamat kit us akwa kwisha azara. 3 Sun kiamtuasmin, Saulone Diosta piantuza pizshinat kit wan yalta napta, ampurakas ashamparakas tainana, kajchira sipnana.

Felipene Dios watsal pit Samaria sura kainammtu

4 Jerusalén pìpulukis imturuzne minta iamtuara Dios pit kainaara. 5 Felipene, maza usparuztas, Samaria pìpulura it kit Cristowa kwinta kinamizta. 6 Awane wanmakkat kit Felipe kaizta aizpa kwisha wat minñara. Felipene iztasparit kal kira, awa Diospa wat piankamanapa. 7 Felipene kwisha akkwan awara saliz piztittuza puzninnara. Saliztuzne usparuztas puzat kit kwian kit iara. Usne kaniya nastuzakas wat mitti chasachiruzakas kulkinnara. 8 Sun akwa sun pìpulukis awane kwisha wat kulara.

9 Simónne Samaria pìpulura uzta. Sua akkwan añokima Samaria suwara tañu kimizta. Usne wan awaruza kain kinat kit ishkwinnat kit “nane anza tintamika ish” kiznara. 10 Wan we tintaruzkas wan awaruza inintuzkas ussa wat miashit kit kaizara: “An ampune an tinta i. Usne Diospa katsa kiwainmumika i,” ñanta kizara.

11 Uspane ussa wat miat kit kanpaara, akkwan añokima usparuza kain kinat kit tañu kimtu akwa. 12 Felipene usparuza Dios awaruza ininnashimtu kainanara. Jesucristo awaruza watsat milnashimtu kamtanamtuasmin, akkwanne Jesucristora nij-

kulara. Dios watsal pit miarawane, Felipene ampuruzakas ashamparuzakas munninnara. **13** Simón nijkulish kiztawane, Felipene ussa munta. Suasne usne Felipera kanpamizta. Felipe iztaspavit kal kirit akwa, usne iztaspavit.

14 Inintaruzne Jerusalén pipulura purara. Uspane Samaria awa Dios kaizta aizpa miaravit piankamat kit Pedrorakas Juantakas ta ininñara. **15** Samaria pipulura piannatpane, uspane Dios ta paikuara, Diosta piantuz Sinam Izpulta sappanapa. **16** Mama Sinam Izpulne usparuzaza pizna atchi. Anpat Jesústa nijkularit akwa, Felipene usparuzaza munninnara. **17** Suasne Pedrokas Juankas uspa chihti usparuzaza panamtuasmin, Sinam Izpulne usparuzaza piznara.

18 Inintaruz usparuzaza chihti paanamtuasmin, Simónne Sinam Izpul usparuzaza piznamtu izta. Usne pial milashit kit usparuzaza **19** ka kaiznara:

—Nawakas an iztaspavit kal kin kiwaincha, na chihti paaka, Sinam Izpul awaruzaza piznara, kizta.

20 Suasne Pedrone ussa kaizta:

—Up pialkas nukas parejuin karinazi. Nune Dios milamtu aizpa pialkasa painash nil chi mintu. **21** Nune Diosta pianchi. Aukasa sun kal kisachi. Diosne nu kajichukin nu kwail mintu aizpa pian. Nu kishimtu aizpa nil chi. **22** Katmizna nune nu kwail kishimtu aizpa maiz kit chihkari. Diosta paikwatpa, nu kwail mintu aizpa kajichura wat kulnara. **23** Nane nu kwail kishimtu aizpa pianish. Pial kana kishimtu akwa, nune ñan miwara ishimtu.

24 Suasne Simónne ka sinkara:

—Anpat Jesústa na akwa paikwarain, nu kaizta aizpa, sun nawa kimanpa.

25 Awaruzaza Jesúspa kainanarawane, Dios pit kaiznarawane, Pedrokas Juankas Dios watsal pit akkwan Samariawa pipulurakas kainana iilta. Suasne Jerusalén pipulura kailpailta.

Felipekas etíope ampukas

26 Sun kitpane, Anpatpa ángelne Felipera ka kaizta: “Kuks kit imizti. Jerusalén pipuluras Gaza pipulura miwara itpa.” An mine pul sura pinmu.

27 Felipene kuhs kit it kit miwara etíope ampura wanmalta. An katsa ininmikane Candace Etiopía suras ashampa mikwara



Felipekas etíope awakas caballo carrowara chamtu

kiwainta, uspa pial watsanpa. Usne Jerusalén pipulura ira, Diosta wakpuj wain kit paikwan. **28** An ampune paiña sura kail-timtuara. Paiña carro caballo imtuasmin, usne Isaías pínkih parit aizpa iztuara.

29 Suasne Sinam Izipulne Felipeka kaizta: “Carro caballora kashara it kit wanmakti,” kizta.

30 Kashara it kit Felipeka us Isaías pínkih iztu mira. Ussa mímara:

—¿Nu iztu aizpa mimtukish?

31 Ampune ussa kaizta:

—¿Mizama minapai? Minminkas nawa kainarachi.

Usne Felipeka paikwara, uskasa carrora nut kit uznapa.

32 Usne Dios pit ka iztu ara:

“Uspane ussa pirikukana milta, piantana.

Usne piriku pashpakana i. Piriku ash titmumika ash tittane, usne aztachi.

Uskas puñain ara.

33 Us kwail kitchikas, uspane ussa nil aizpa kiarachi.

Minainkas ussa kiwainarachi. Minainkas paiña kwalpa paramanazi.

Paiña kwalne ussa piantaara, an sukin uzmanpa.”^a

^a **8.33** Is 53.7-8

34 Inimikane Felipera mimara:

—Kainazha. An kainammikane ¿Minpama paramtus? ¿Us-pa paramtuki? ¿Mamazpa paramtuki?

35 Suasne Filipene sunmin Dios pinkih iztukin Dios watsal pit, Jesús-pa pit, kamtamizta. **36** Imtuwaiyasmin, uspane kwazi wakin piannailta. Ininmumikane ussa kaizta:

—Apane kwazi wai. ¿Nawa munnasachimakish?

37 (Felipene ka kaizta:

—Nu Jesucristora up kaijchukin nijkultane, kishina.

Usne sinkara:

—Nane Jesucristo Dios painkul i nijkultus, kizta.)

38 Suasne ininmumikane carro caballo uzninnapa ininta. Paasas pira kihstawane, Filipene ussa munnara. **39** Uspa kwaziras salaktawane, Anpatpa Izpulne masain Felipera mil-ta. Inimikane ussa anne me iztachi. Usne wat kul kit paiña miwara ira. **40** Filipene Azoto pipulura tuat kit wan pipuluki Dios watsal pit kainanara, Cesarea pipulura piannanki-ma.

Saulone Jesús-ta pianmika namtu

(Hch 22.6-16; 26.12-18)

9¹ Sun urain Saulone “Anpatpa piantuza piantananash” tinta kainanamizta. Katmizna usne katsa pariyara it kit pinkih paikwara, ussa Israel kammu yalta ininnannapa. **2** Sun pinkih-kasa Damasco pipulura ishimtu ara, Dios miwara imtuza pizna-na. Usne ampuruzakas ashamparuzakas Jerusalén pipulura milshinara, usparuza sipnana. **3** Kasha Damasco pipulura miwara pianamtuasmin, masain Saulone chiwazha naztam chiyuras taiztimtu izta. **4** Suasne Saulone pilita nainta. Mazane chiyuras ussa parat kit kaizta: “Saulo. Saulo. ¿Chikishma nawa naiznintus?”

5 Suasne Saulone mimara: “Anpat ¿Min mas?” kizta. Usne sinkara: “Nane Jesús ish. Nu nawa piantuza piantamtu akwa, nune nawa naiznintu,” kizta. **6** Suasne Saulone ul kit ishwat kit sinkara: “Ap Anpat. ¿Chima kishiras, na kinpa?” kizta. Anpatne ussa sinkara: “Kuks kit pipulura napnaka. Suasne nane nua nu kishimtu aizpa kaiznash.”

7 Saulokasa imtuzne ishkuara. Sun pitta miarakas, uspane minainkas izarachi. **8** Kwiztane Saulone piltas kuhsakta. Kasu

izkultakas, izaſchiwal. Imturuzne paiña chihtira pizat kit Damasco pipulura tain iara. ⁹Suane kutña payukima izmanamti tuara. Kumira kwatchiwal. Kwazikas kwatchiwal.

¹⁰Dios pit pianmikane, Ananías muntitmikane, Damasco pipulura uzta. Anpatne ussa kainkizpamnin kit ussa kaizta: “Ananías,” kizta. Usne ka ſinkara: “Anpat. Nane akki tus,” kizta.

¹¹Suasne Anpatne ussa kaizta: “Kuhsak kit ‘Nil’ muntit miwara imizti. Judaspa yalta piannakane, Tarso suras awara, Saulo muntitmikasha, mimanaka. ¹²Usne Diosta paikwat kit chiwazha kainkizpam izta. Kainkizpamtuasmin, Ananíasne sun yalta nap kit paiña chihtikasa ussa paara, mamasa iznapa. Sunkana kainkizpamtu.”

¹³Sun mirawane, Ananíasne kaizta: “Anpat. Akkwanne nawa sun ampuwa kwinta kiara. Usne Jerusalén pipulukin Jesússta pian tuza akkwan kwail kinarit. ¹⁴Mane akki amtui. Katsa pariyaruzne ussa pinkihkasa ininta, Jesússta paikumturuza kajchira ſipnana.”

¹⁵Anpatne ſinkara: “It. Nane an ampura narau, nawa mamas su uztuzakas uspa ininturuzakas Israel awaruzakas parana napa. ¹⁶Nawa kanpashimtu akwa, usne naiznazi. Nane ussa sun naizmu annash.”

¹⁷Suasne Ananíasne Saulo tura ira. Naptawane, usne paiña chihtikasa ussa pat kit kaizta:

—Aña Saulo. Nu miwara amtuasmin, Anpat Jesúsne, nua miwara izpamtamikane, nawa ininta, nu mamasa iznapa, Dios Izpul nua piznapa.

¹⁸Sun urain chiwazha piachal iztitkana kasuras taizakane, mamasa izta. Suasne Saulone kuhs kit munarit azi. ¹⁹Kwiztane kwat kit mamasa tinta kulta. Usne akkwan payuchikima Diosta piantuzkasa Damasco pipulura nukkulta.

Saulone Damasco pipulura kamtanamtu

²⁰Kwiztane Saulone Israel kammu yalta kamtanamiz kit “Jesúsne Dios painkul i” kiznara. ²¹Wanne us kaizta aizpa iztaspaat kit kaizara:

—An ampune Jerusalén pipulura Jesússta paikumtuza pizshinamtu. Usne, piznammikane, apain ara, Jesússta piantuza katsa pariyaruza miłnana, usparuza ſippnana.

²²Saulone an tinta kainanamizta, “Jesús Dios inintamika i”


kiz kit. Paiña kamtit akwa, ussa Judío awa Damasco pipulukin uztuza annuppanarit. Uspane Saulora sinkaarachi.

Saulone pizamasara

23 An imparane, Judío awaruzne nijkulara, Saulora piantaana. 24 Minpazha uspa minñamtu aizpa piankam kit Saulora kaizta. Uspane sun Damasco pipulu katsa kalpialkin, pijta puzmukin, purara. Uspane, aliztuzne, payuwarakas amtawarakas pipulu pijta puzmukin izat kit tirizara, ussa piantaana. 25 Tilpamizkane, Dios pit piantuzne ussa katsa timta win kit katsa uk kalpialtas inkihshara. Sunkana pizamasara.

Saulone Jerusalén pipulura imtu

26 Jerusalén pipulura piannatpane, Saulone Cristora nijkulturuza wanmakhshira. Wanne ussa ishkuara. Uspane us Dios pit pianchimika minñara. 27 Suasne Bernabéne ussa kiwain kit inintaruza milnara. Usne Saulo Damasco miwara Anpatta izta aizpa kainara. Anpat ussa kwinta kira aizpa kainara. Damasco pipulukin nukkultuasmin, usne sun awaruzna Jesús pa kwinta kinara, ishkwatchin. Sunkana kainanara. 28 Suasne Saulone uspakasa nukkul kit Jerusalén pipulura uspakasa chaara. Usne usparuzna Anpatpa kwinta kinara. 29 Jesús pa kamtamtuasmin, minminkas ussa kunkitchi. Usne ishkwatchi. Mazantuzne, Judío awaruzne, Griego pit paraara. Uspane tinta kwinta kiat kit ussa mimaara. Uspane ussa piantashiara. 30 Sun piankamarawane, Diosta piantuzne Saulora Cesarea pipulura miarit. Tas ussa Tarso pipulura ininñara.



Pablora timta inkihshamtu

31 Suasne wanmakmuruzne Judea suraskas Galilea suraskas Samaria suraskas kalpain uzat kit Dios pit an kamamiz kit an tinta namara. Uspane Anpat kuruntu aizpa kishiara. Sinam Izipul usparuza kiwainara akwa, an akkwan awane Diosta piankamara.

Eneasne wat parit

32 Diosta piantuza iznamtuasmin, Pedrone Jesússta piantuza, Lida pipulura uztuza, iznana ira. 33 Suane Pedrone Eneas munikasha wanmalta. An chasachimkane ocho añokima kamarain tuara. 34 Pedrone kaizta:

—Eneas. Jesucristone nua kakultanazi. Kuhsti. Up kama watsari, kizta.

35 Eneasne masain kuhsakta. Lida pipulukin uztuzkas Sarón sukin uztuzkas ussa izara. Uspane an ñamin nijkulara aizpa chihkaat kit Anpatta nijkulara.

Dorcasne irittas kakul kit kuhstu

36 Mane Tapitane Dios pit piankam kit Jope pipulura uzta. (Usne Griego pitta Dorcas muntit.) An ashampane pailta payu wat kinat kit we mijtuza kiwainara. 37 Maza payune usne imtu kit kit irit. Hlparuz aumiza kamtit akwa, aune iritta sinam pinat kit ussa kwash pitmumal taara. 38 Jope pipulune Lida pipulura kasha uzara. Pedro Lida pipulura uztuasmin, Dios pit piantuzne paas ampura Lida pipulura ininnara, Pedrora ka paikwanpa, Jope pipulura azain anpa.

39 Suasne Pedrone uspakasa ira. Piannaakane, uspane ussa irit tura anna iara. Wan ampu irit ashamparuzne ussa salpin kunara. Azamtuasmin, uspane ussa kwakshamkas kamishakas anara. Ka uzasmin, Dorcasne pīn sip kit usparuza milanara. 40 Suasne, Pedrone wanta puzninnat kit wakpuj wain kit Diosta paikwara. Irit ashampara iz kit ka kizta:

—Tabita, kakulti.

Suasne usne kasu izkulkwera. Pedrora iz kit kuhsak kit uzta. 41 Usne paiña chihti piz kit kuhsninta. Kwiztane usne Diosta piantuzakas ampu irit ashamparuzakas akwanara, ussa izanapa. 42 Jope pipulukin kwisha akkwan awane Jope pipulukin sun piankamara. Sun akwa, akkwan awane Anpatta nijkulara. 43 Pedrone an akkwan payura Jope pipulura Simónpa yalta mara. Usne aya suintam sammika ara.

Pedrokas Corneliokas

10 ¹Cornelione Cesarea pipulura uzta. An suldarura ininmikane maza cien suldaruruza Italia suras ininnara. ²An wat awane paiña kwalkasa Diosta wakpuj wainñiat kit Diosta paikwashira. Usne akkwan pial Judío wenamturuza miñanat kit Diosta pailta payu paikwara. ³Maza payu nashka, kutña urara, chiwazha kainkizpara. Usne maza Diospa ángel us tukin napka izta. Ángelne ussa ka kaizta: “Cornelio,” kizta.

⁴Cornelione ángelta iztaspat kit ishkwat kit mimara: “¿Anpat, chima pashimtus?” Suasne ángelne ussa ka kaizta: “Diosne nu paikwat aizpa mira. Usne, chiyura uzmikane, nu wenamturuza miñanara aizpa piankam kit maintachi. ⁵Maza awara Jope pipulura ininnaka, Simóna akwanpa, up yalta karanpa. Pedrokas muntit. ⁶Mamaz Simónne, aya suintam sammikane, paiña yal pimara mij. Pedrone uskasa uztu. Usne nu kishimtu aizpa kaiznazi.”

⁷Ángel kwinta kit kit kaitawane, Cornelione paas kiwainmuruzakas maza suldarura Diosta pianmikashakas, akwanara. ⁸Us usparuza wan kwinta kinarawane, usne Jope pipulura ininara.

⁹Tilawara uspa miwara kashara Jope pipulura iamtuasmin, Pedrone payu aizpa yal isalmal nura, Diosta paikwan. ¹⁰Yak kit



Cornelio Diosta paikumtu

kit kwashira. Paiña kumira ainamtuasmin, kainkizpamtuasmin, usne chiwazha izta. 11 Chiyura kai maltuasmin, Pedrone katsa pñ iztitkana izta. Anne chiyuras piltakima katsa pñkana taizta. 12 Sun katsa pñ iptitkin, akkwan ampara mitti waj kalpakas kamtakas chitchukas waara. 13 Suasne Diosne ussa kaizta: “Pedro. Kuhsak kit piantat kit kwat,” kizta.

14 Pedrone sinkara: “Anpat, nane kumanash. Nane mizurainkas Dios chiwazha kwanchi kizta aizpa kwatchish.” 15 Suasne Diosne mamasa parat kit ka kaizta: “Nune chiwazha Dios sinam sarit aizpa kwashina. Dios sarit aizpa kwasachish kizmun,” kizta.

16 Sun pñ kutñakima taiztawane, katsa pñne chiyurain kailta. 17 Pedro Dios ussa kamtashimtu aizpa mintuasmin, Corneliowa inintuzne pijtakin aat kit Simónpa yal minta tui kiz mimaara. 18 Pianaarawane, uspane minpazhara ka mimaara: “Simóne, Pedro munmikane, ¿Mintama tu? ¿Nune ussa yal nammi-lamtukish?”

19 Pedro kainkizpamtu aizpa mama mintuasmin, Sinam Izpulne ussa kaizta: “Miri. Kutña awa nua sayamtu. 20 Kuhs kit kihsh kit uspakasa kuntachin kanpanari. Nane usparuza innanrau.”

21 Suasne Pedrone Corneliowa inintuz purakin kihsh kit kaiznara:

—Nane, u sayamtumikasha ish. ¿Chinmaka awiznash?

22 Uspane ka sinkaara:

—Aune Cornelio cien suldaru ininmika akwa awiznash. Usne wat awa i. Usne Diosta wakpuj wain kit paikumtu. Wan Judío awane ussa wat minñat kit pashiamtu. Diospa ángelne ussa ka kizta: “Pedrora inin kit akwatpa, paiña yalta inpa. Us kaizta aizpa mirawa,” kizta.

23 Suasne Pedrone usparuza napninnat kit an amta yal nammilanara. Tilawarane Pedrone uspakasa ira. Minpazha Jope pipuluras Diosta piantuzkas ussa kanpaara.

24 Mamaz payurane Cesarea pipulura nappaara. Pedrora tiriztuasmin, Cornelione paiña kwaltakas paiña izmuruzkas akwanara. 25 Pedro yalta putnatpane, Cornelione puz kit “wat kintire” kiz kit ussa wakpuj wainta, Dios ussa inintit akwa. 26 Pedrone ussa kuhsaknin kit kaizta:

—Kunti. Nawa wakpuj wainkain. Nane nukana ampu ish.



Pedro Cornelio yalkin uztuza paranamtu

27 Uskasa paramtuasmin, Pedrone nap kit kwisha akkwan awa wanmakkarittuza iznara. 28 Suasne Pedrone kaiznara:

—U na kaiztu aizpa pian. Judío awane Judío chi awaruzkasa wanmakkasachi. Uspa yalta nappasachi. Une sun Moisés ininta aizpa pian. Mane Diosne Judío chi awaruzkasa wanmakna impachi kamtash. Dios wan awaruzza sapkane, aukas usparuzza saptawamakpas. 29 Katmizna nu nawa akukane, masain chinkas kiztachi arau. Nane piankamshimtus: ¿Chikishma nawa akupuspas?

30 Suasne Cornelione sinkara:

—Ampara payuin nane sun urara ap yaltain uz kit kumira kwatchish. Kutña urarain Diosta paikwarau. Suane maza ampu ne naztam pñn kwarit nawa izpanzi ish. 31 Nawa kaizish: “Cornelio. Diosne nu paikumtu aizpa mira. Usne nu we mijtuza kiwainnamtu nijkulta. 32 Mazara Jope pipulura ininti, Simóna kanapa. Usne Pedrokas muntit. Usne mamaz Simónpa yalta tu. Sun suintam aya sammikane pimakin uz. Pianakane, usne nukasa paranazi.” 33 Sunkana mamin inintau, nua saina. Nu wat kirit an. Mane Diosne aukasa uz. Anpat nua inintu akwa, aune wan Anpat aumiza kaizta aizpa mishipuspas.

Pedrone Corneliowa kwalta kwinta kin namtu

34 Suasne Pedrone kwinta kit kit kaiznara:

—Mane watcha nane Dios wan awara kawarain kinanapa mimtus. 35 Diosne wan suras awaruzakas Diosta mimtuzakas nil

kimtuzakas kiwainat kit sapananazi. **36**Diosne sun pit Israel awawa kwaltuza paranara. Usne watsal pit kainanara, awa Jesucristo akwa Dioskasa kalpain uzanapa. An Anpatne wanta ininashimtu. **37**Une wan Judea sura chiwazha kirit aizpa wat pian. Juanne, munnamtumikane, sun pit awara kainanara. Usne sun pit Galilea sura kainanamiz kit munana kainnanara. **38**Une Dios Jesústa, Nasaret pipuluras atmikara, narit pian. Usne paiña Sınam Izpulta ininta, ussa kiwainnapa. An sukin uztuasmin, usne awaruza wat kinat kit ishturuza kakulninnat kit Satanás akwa naizturuza kakulninnara. Dios uskasa chamtu akwa, usne sun kirit. **39**Aune wan Jesús kit aizpa Judea surakas Jerusalén pipulurakas iztamakpas. Kwiztane uspane ussa kurish tira patpian kit piantaara. **40**Kutña payu pailtawane, Diosne ussa irittas kakulat kit aumiza izpaninta. **41**Wan awaruza izpannintachi. Aumizain izpaninta. Diosne aumiza ñamin nanarit, us kirit aizpa iznapa, sunpa mamaztuza kainanapa. Us irittas kakultawane, uskasa kwatmakpas. **42**Usne aumiza ininnara, awara Dios pit kainanapa. Diosne Jesústain katsa mikwakana namnintit, wan awaruza, irittuzakas uztuzakas, ininannapa. Sun pit awaruza kainanaramakpas. **43**An ñancha Diospa kainammtuzne Jesúspa kwinta kiara. Awa Jesústa nijkularane, Diosne uspa kwail kiarit aizpa wat kulninnanazi, kizara.

Sınam Izpulne Judío awachiruzakas piznamtu

44Mama Pedro kwinta kimtuasmin, Sınam Izpulne wan paiña pit miraruza piznara. **45**Judío awane, Dios pit nijkulturuzne, Pedrokasa aarittuzne, iztaspaarit, Sınam Izpul Judío awachiruzaza piznarit akwa. **46**Katmizna Judío awachiruzne mamaz pit parat kit “Dios kwisha wari” kizara. Judío awaruzne sun miara. **47**Suasne Pedrone kaiznara:

—Aune sun awaruza munnashinamakpas, Sınam Izpul usparuza aumizakanain piznara akwa.

48Usne usparuza munnanapa ininnara, Jesústa nijkularit akwa. Kwiztane Pedroro paikuaara, uspakasa akkwan payuchikimain tuanpa.

Pedrone us kirit aizpa kwinta kinara

11 **1** Inintaruzkas Judea suras Jesústa piantuzkas Judío awachiruzpa miara. Uspane Dios pit piankamat kit Jesústa nijkulara. **2** Pedro Jerusalén pipulura nut kit kailtawane,

Judío Jesústa nijkulturuzne Pedrora tinta aliz kulat kit 3 ka mi-maara:

—¿Chitmaka Judío awachiruzza it kit iznat kit uspakasa kwara?

4 Suasne Pedrone usparuza wan chiwazha kirit aizpa kamtana-t kit kaiznara:

5—Nane Jope pipulura tuarau. Diosta paikumtuasmin, chiwazha iztau. Nane katsa pĩnkana chiyuras kihshtu iztau. Ampara pĩn punta iptit. Na tukin kihshmitza. 6 Chi wa aizpa iztuasmin, nane ampara mitti waj kalpakas ishukas kamtakas chitchukas iztau. 7 Diosne nawa kaizzi ish: “Pedro kuhsti. Piantat kit kwat.” 8 Pedrone sinkara: “Anpat. Kumanash. Mizurainkas Dios chiwazha kuanchi kiztu aizpa kwattarakish.” 9 Suasne Diosne chiyuras mamasa kwinta kit kit kaizzi ish: “Nune chiwazha Dios sara aizpa kwashina. Dios sarit aizpa kwasachish, kizmun.” 10 Sun kutñakima iztawane, wanne chiyumarain nuara. 11 Sun urain kutña ampune Cesarea pipuluras na tu yalkin pianazi. Us-pane nawa sayara. 12 Sinam Izpulne uspakasa ininzi ish, kunkitchiwal. An seis Diosta piantuzkas nakasa iara. Wanne awawa yalkin nappanash. 13 Usne maza ángelta izta aumiza kainara. Usne paiña yalta kun kit kaizta: “Awara Jope pipulura ininti, Simón-ta akwan. Usne Pedrokas muntit. 14 Usne Dios pit nua kaiznazi, Dios nuakas up yalkin uztuzakas watsat milnanapa.” 15 Na usparuza kaiztuasmin, Sinam Izpulne usparuza piznara, aumiza an ñancha piztakanain. 16 Suasne Anpat kaizta aizpa ka nijkul-tau: “Watcha Juanne kwazikasa munnanara. Kawarain Sinam Izpulne uruza piznanazi.” 17 Diosne paiña Sinam Izpulta au Anpat Jesucristora piankamturuza milanara. Kawarain Diosne paiña Izpulta an awaruza milanashira, uspakas Jesústa nijkulara akwa. Nane “Dios kishimtu aizpa kwail i” kizmanash.

18 Suasne Jesústa piantuz Jerusalén pipulukin sun pit miarawane, puñain paat kit Diosta kwisha wari kizat kit kaizara:

—Sunkana Diosne Judío awachiruzakas kiwainamtu, kwail kiarit aizpa maizanapa, Diosta kanpanapa, chiyura uzanapa.

Antioquía pipulura wanmakkamtu


19 Esteban irawane, minpazha Jesústa nijkulturuzne Fenicia surakas Chipre surakas Antioquía pipulurakas iat kit naizmasara. Suane Dios watsal pit Judío awarain kainanara. Mamaz awara kainanarachi. 20 Minpazha Jesústa nijkulturuzne Chipre su-

raskas Cirene suraskas Antioquía pipulura piannat kit Judío awachiruzakas Dios watsal pit au Anpat Jesús pa kwinta kinara. 21 Dios usparuza kwisha kiwainnara akwa, akkwanne antikwa pit kamtit aizpa chihkaat kit Jesús ta nijkulamizta.

22 Jerusalén pipulura wanmakmuruz sun pit miarawane, uspane Bernabé ra ininñara Antioquía pipulurakima. 23 Pianatpane, Bernabé ne Dios usparuza wat kiwainarit nijkul kit kwisha wat kulta. Usne wanta kurunnara, nil uzanapa, Anpatta kwaiya-manpa. 24 Bernabé ne wat awa azi. Sinam Izpulne ussa pizta. Diosta wat nijkulta. Sunkana akkwan awane Jesús ta piankamarara.

25 Suasne Bernabé ne Tarso pipulura ira, Saulora saina. Ussa wanmaltawane, Antioquíara milta. 26 Uspane maza año kapal Cristora piantuzpa wanmakmukin tuat kit kwisha akkwan awara kamtanara. An ñancha Antioquía pipulukin, awane Jesús ta piantuza, Cristora kanpamtuz munnara.

27 Sun payune minpazha Dios pit kainammtuzne Jerusalén pipulukis Antioquía pipulura aara. 28 Mazane, Agabo muntitmi-kane, Jesús ta pianmikane, awa paizkakin kun kit Izpul ussa piankamninta aizpa kainanara. “Wan sura kumira pailnazi” kiznara. Claudio katsa mikwa inintuasmin, us kaizta aizpa kirit. 29 Suasne Antioquía pipuluras Jesús ta piantuzne pial wantaa-



Barnabé Pablora saimtu, yal puttuasmin

mizta, Judea sura uztuza ininna, Jesústa piantuza kiwainanapa. Wanne uspa mij aizpakima milaara. **30** Sunkana kiarawane, uspane sun pial Bernabékasa Saulokasa ininñara, Judío ilapa inintuza milanapa.

Santiagone imtu. Pedrora sippamtu

12 ¹ Sun payune Herodesne, katsa mikwane, Jesústa piantuza piznamizta, usparuza naizninnanapa. ² Usne Santiagora, Juanpa aimpishsta, iru kwizkasa piantaninara. Pan kiñakasa kukain pishta taiznapain paka, usne sun kirit. ³ Sun kitpane, Judío awane wat kularit. Suasne Herodesne Pedrorakas pizna ininta. ⁴ Pedrora piztawane, ussa kajchira sipninta. Ampara suldarune sulmin ussa izamtu pura. Kwiztakas an amparane kutña pijikima, ussa izamtu pura. Pascua pailka, usne ussa chihtnash minta, awa ussa piantanapa. ⁵ Sunkana Pedro sam kuhtit kajchira tuasmin, Diosta piantuzne, wanmakmuruzne, Diosta tinta paikuamizta.

Ángelne Pedrora kajchiras chihttu

⁶ Herodes ussa chihtachasmin, sun amtain Pedrone paas suldaruwa paizkakin pittit tuara. Pamals chihti kuhtit tuara. Mamaz suldaruruzne kajchi sipmu pijtakin izamtu pura. ⁷ Masain maza Anpatpa ángel izpamtuasmin, kajchira kai malta. Usne Pedrora chihtikin paat kit izkultat kit kaizta: “¡Kuksakti azain!” Suasne iru cadenane Pedrowa chihtikis chihtkulta. ⁸ Ángelne ussa kaizta: “Pín milti. Mitti nukmu kuhti,” kizta. Pedro sun kuh-tuasmin, ángelne ussa kaizta: “Up kwaksham kwat kit nawa kanpazha.”

⁹ Pedrone ángelpa kwizpa kajchiras puzta. Usne ángel kit aizpa wat pianchi. Chiwazha iztus minta. ¹⁰ Uspane paas izmuru-zkimin pinpailta. Iru pijtakin pianamal piannailkane, pijtane kain chihtkularit, puzpailna. Pipulu miwara ikane, ángelne usain mazantain panaj ira.

¹¹ Suasne Pedrone nijkul kit usmin kaizta: “Nane nawa kit aizpa watcha nijkulish. Anpatne paiña ángelta ininta, nawa chihtnapa, Herodeskas Judío awakas nawa kishiamtu aizpa kiamampa.”

¹² Sun mintuasmin, Pedrone Maríawa yalta ira. Sun ashampane Juanpa akkuhsh ara. Juanne Marcoskas muntit. Sun yal-



Ángel Pedrora izkultintu

kin kwisha akkwanne wanmakkara, Diosta paikwan. **13** Pedro pianamal pijtakin piannapkane, maza ashampa pashpane, Rode muntitmikane, mintakas izna puzta. **14** Pedrowa pit nijkul kit mirawane, usne pijta chihtachi. Wat kul kit aīnmin ayukmal naptit, Pedro pijtakin panamtu kizna. **15** Suasne uspane ussa kaizamizta:

—Pirail, kizara.

Usne watcha kiznamizta. Ussa miarachi akwa, uspane kaizara:

—Us chi. Paiña izpulmin izta.

16 Sun kwinta kimtuasmin, Pedrone pijtakin piannapmizta. Pijta chihtawane, uspane ussa izat kit ishkuara. **17** Usne chihtikasa annara, puñain paarinpa. Usne Anpat ussa kajchiras chihtit kainanat kit kaiznara:

—Sunta Santiagorakas Diosta piantuzakas kainarain, kiznara.

Suasne yaltas puz kit mamaz sumal irit.

18 Kinkane, suldaruruzne ishkuat kit chi kirit pianchi. Uspane usparuzpain Pedrowa tinta kwinta kiamizta, minta Pedro irit pianchi akwa. **19** Herodesne inninara, ussa saina. Saimanamari-kane, sun suldaruruza mīmanara. Suasne Herodesne suldaruruza piantanapa ininta. Kwiztane Herodesne Judea sukis puz kit Cesarea pipulura uzna ira.

Herodesne imtu

20 Herodesne Tiro pipulukin uztuzkasa Sidón pipulu uztuzkasa aliz kulnarit. Maza mazain usparuzpain nijkulat kit Blastora kwinta kin iara, usparuza kwainanapa. Blastone Herodespa

kiwainmika azi. Blasto akwa uspane Herodeskasa waya kimanpa paikuara, kalpain uzanapa. Herodespa sukin kumira wa akwa, uspane sun sukin kumira paina iara. ²¹ Herodesne narit payura watsal pñ kwat kit kwash ininmikawa uzmuquin uz kit usparuzawa watsal pit kwinta kinara. ²² Suasne wanmakmuruzne kwianamizta: “Sun parammikane ampukanachi. Usne dioskana paramtui,” kizara. ²³ Sun urain Anpatpa ángelne ussa imtu kininta, Herodes “Dios wari” kiztachi akwa. Suasne puil ussa kwat kit ira.

²⁴ Sun payuin akkwan awane pailta sura Dios pit piankamamizta.

²⁵ Inintaruza pial chíhkarawane, Bernabékas Saulokas Jerusaléntas kailpail kit Juanta, Marcos muntimikasha mipailta.

Bernabékas Saulokas uspa kal kin mazamiztu

13 ¹ Mane Dios pit kainammtuzkas kamtamtuzkas Jesústa piantuzkasa Antioquía pipulura wanmakkara. Bernabékas tuara. Simónkas, tilapat muntimikakas, tuara. Luciokas Cirene suras tuara. Manaénkas, Herodeskasa Galilea sura kawiatmikakas, tuara. Saulokas tuara. ² Anpat iztakin wanmakkat kit paikuamtuasmin, maza payura kumira kuarachi. Suasne Sinam Izpulne kaiznara: “Bernabékas Saulorakas paimpa inintain, na ininta aizpa kal kianapa,” kiznara.

³ Suasne Diosta paikuarawane, kumira kuarawane, wanmakmuruzne usparuzawa chihti panat kit “watmin iilnaka” kizara.

Inintaruzne Chipre sura Dios Pit kainaamtu

⁴ Kwiztane Sinam Izpul usparuzawa inintawane, Bernabékas Saulokas Seleucia pipulura iilta. Tas katsa kanuara waat kit Chipre pi paizka sura iilta. ⁵ Salamina pipulura pianailtawane, uspane Judío kammu yalta Dios pit kamtanamizta. Juankas usparuzawa kiwaina ira.

⁶ Wan pi paizka sukin iiltawane, Pafos pipulura piannailta. Sua uspane maza Judío awara wanmakpailta. Usne Barjesús munta. Usne tañu kinammika azi. Nane Diospa kainammika ish kiztakas, pirail kaizta. ⁷ An tañu kimikane, Sergio Paulokasa, sun sukin mikwakasa tuazi. An mikwane wat minta. Mikwane Bernabékas Saulorakas akwanpa ininta, Dios pit mishimtu akwa. ⁸ Elimasne, tañu kim muntimikane, tuara. Usne usparuz-

kasa nijkultachi. Usne uspa kaizta aizpa kancha kainara, Sergio Paulo inintuz kaizta aizpa mïmanpa. ⁹ Saulone Pablokas muntit. Suasne Sinam Izpul ussa piztuasmin, Pablone Elimasta tinta iz ¹⁰ kit kaizta:

—Nune Diablowa kwalkana i. Nune wattuza aliz i. Nune kwisha akkwan kwail kishimtu. Nune Anpat kamtara aizpa maizshira, us kaiztu aizpa pïrail i kiznapa. Sun kimun. ¹¹ Mane Anpatne nua ilnazi. Akkwan payukima izmananazi, pa izmanpa, kizta.

Sun urain paiña kasu izsachi parit. Usne kai izmanamta. Usne mamazta saira, paiña chihtira tain inpa, izsachi akwa. ¹² Mikwa sun kit aizpa izkane, usne Diosta nijkulta. Usne Anpatpa kamtampa iztasparit.

Pablokas Bernabékas Pisidia sura iilta

¹³ Pablokas paiña izmuruzkas Pafos sukis iat kit kanuara waat kit Panfilia sura iara, Perge pipulurakima. Juane usparuztas tiwij inat kit Jerusalén pipulura kailta. ¹⁴ Kwiztane uspane Pergekis Pisidia sura pinara, mamaz Antioquia pipulurakima. Suane uspane kwaizkulmu payura Judío kammu yalta nap kit uzpailta. ¹⁵ Suasne Moisés parit aizpakas Diospa kainammika parit aizpakas izarawane, kammu yalpa ininmikane mazara ka kaiznapa ininta:

—Aimpihstuz, mirain. Chiwazha pit awaruza kurunnamtu-ne, ma pararain.

¹⁶ Suasne Pablone kun kit chihtikasa anak kit puñain pai-kwat kit kaiznara: “Israel awa mirain. Israel awachiruzkas Diosta piantuzkas nawa mizhain. ¹⁷ Israel kwaltuzne Diosta wakpuj wainñara. An Diosne au Israel kwaltuzna nanara, akkwan usparuzka kawinana. Egipto sura mamaz awakana uzasmin, kwiztane usne usparuzka tinta kiwainara, an sukis ianapa. ¹⁸ Usne usparuzka pul sura kiwainat kit usparuzka cuarenta añokima tailchana. ¹⁹ Usne wan Canaán sura uztuzka piantaninnara, au an ñancha kwal uspa su sappanapa. ²⁰ Ampara cien año cincuenta añokasa pailtawane, uspane sun su sappara.

Kwiztane Diosne inintuzka ininnara, Israel awaruza ininnanapa, Samuel, Diospa kainammika amtu payukima. ²¹ Suasne uspane an katsa mikwara Diosta paikuara, usparuzpain ininnanapa. Suas Diosne Saúlta nara, usparuzka ininnanapa cuarenta

añokima. Usne Cisca painkul azi. Usne Benjamínpa kwal azi. 22 Kwiztane Diosne Saúlta kwairit, ininnamanpa. Davidta mi-kwa namnin kit nat kit kaizta: ‘Nane Davidta, Isaípa painkulta, narit ish. Usne wat awa i. Usne na inintu aizpa kinazi.’^b 23 Davidne Jesús pa pampa ilapa azi. Diosne Israel awara sun kin namta, Jesús usparuza watsat milnanapa. 24 Jesús atchasmin, Juanne wan Israel awara kainanat kit kaiznara: ‘U kwail kiarit aizpa maizat kit munnintain.’ 25 Irachasmin, Juanne kaiznara: ‘¿U nawa chi minpuspas? Nane Cristo chish. Mazane nakin anza katsamika ap kwizpa anazi. Nane ussa kiwainmumikakana ish, paiña mitti nukmu ukna,’ kizta.

26 Ap Israel aimpishstuz, mirain. Une Abrahampa kwal mai. Israel awachiruzkas Diosta piantuzkas, mirain. Diosne pailta awaruza an pit kainanara, usparuza watsat milnanapa. 27 Jerusalénta uztuzkas uspa inintuzkas Jesús ta piankamarachi. Dios kainammtuz kaizara aizpa miarachi. Pailta kwaizkulmu payura Dios pit pinkih izarakas, uspane miarachi. Sunkana Jesús ta kwainñamtuasmin, uspane Dios kainammtuz kaizara aizpa kiara. 28 Jesús kwail kitchikas, uspane piantaashit kit Pilatora paikuara, ussa piantaninna. 29 Suasne Jesús pa Dios pinkihta para aizpa pailta-wane, uspane kurishtas tain kihshat kit uk kulta kamara. 30 Diosne ussa irittas kakulninta. 31 Akkwan payurakima Jesús ne Galilea suras kanpamtuzakas Jerusalén pipuluras kanpamtuzakas izpanara. Uspain Israel awaruza uspa izarit aizpa Jesús pa kainaamtu.

32 Sunkana aune Dios watsal pit uruza kainapuspas. Diosne au ñancha kwaltuza sun watsal pit kwinta kin namnara. 33 Aune uspa kwal makpas. Mane Jesús ta irittas kakulnintawane, Diosne auruza kin namta aizpa kirit. Paas kanta pinkihta ka parit:

‘Nune ap painkul i.

Mane nane nua kawirau.’^c

34 Diosne ussa irittas kakultu aizpa kainarit, mamasa imanpa. Dios pinkihta ka parit:

‘Nane Davidta sun wat kin namta aizpa uruza milana-nash.’^d

35 Katmizna mamaz kanta pinkihta ka parit:

‘Nune up pashimtumikasha paiña ña pitninmanazi.’^e

^b 13.22 1S 13.14; Sal 89.20 ^c 13.33 Sal 2.7 ^d 13.34 Is 55.3

^e 13.35 Sal 16.10

36 Dios kaizta aizpa kainarawane, paiña kwaltuza kiwainnarawane, Davidne irit. Usne papihsh kamkin kamat kit paiña ña pittit. 37 Dios Jesústa kakulninta akwa, paiña ña pittachi. 38 Aimpihstuz, mirain. Une Jesús kit aizpa piankamarawa. Aune Jesús akwa Dios u kwail kirit aizpa kaninshina kainapuspas. 39 Diosne Jesústa nijkulturuza, us kaizta aizpa miraruza uspa kwail kirit aizpa wat kulnashina. Diosne Moisés ininta aizpa kiamturuza uspa kwail sinam sanamanazi. 40 Katmizna, kuira-ruin, u Dios kainammika kaizta aizpa naizamanpa. Uspane ka kizara:

41 ‘Mirain. Une Dios kaizta aizpa kwail i kizamtu. Une iztaspaat kit ianazi. Nane Dios ish. U uzamtuasmin, nane chiwazha iztasparit kal kinash. Na u iztakin iztasparit kal kimtukas, une nijkulamanazi.’”^f

42 Pablokas paiña izmuruzkas Judío awa kammu yaltas puzarawane, Judío awachiruzne usparuza ka paikuara: “Mamaz kwaizkulmu payura aumiza sun kamtanaka.” 43 Wanmakmuruz Judío kammu yalkis puzarawane, akkwan Judío awaruzkas Judío awakana namtittuzkas Pablorkas Bernabérokas kanpaara. Dios usparuza pashinamtu. Kamtanamtuasmin, uspane usparuza kurunnara, Diosta kanpaanapa.

44 Mamaz sábado payura, kwaizkulmu payura, pipuluras awane, miza wan chiwal wanmakkara, Dios pit miana. 45 Judío awa kwisha akkwan awaruza iztawane, uspane Pablora aliz kulat kit pashiarachi. Pablo kaizta aizpa nil chi kizamizta. 46 Suasne Pablokas Bernabérokas tinta namat kit kaiznara:

—Aune Dios pit Judío awaruza an ñancha kainanarawash. Une sun watsal pit miashimtuchi. Katmizna une mizurainkas pailta payukima chiyura uzamanazi. Mane aune Judío awachiruzna iiznapas, Dios pit kamtanana. 47 Mikwane sun pitkasa aumiza ininat kit kaizta:

“Nane nua kai malmukana mamaz awaruza ininnarau, wan suras awaruza watsal milnanapa,”^g kizta.

48 Sun miamtuasmin, Judío awachiruzne wat kulat kit Anpatpa pit kwisha wari kizamizta. Dios narittuzne Dios pit miat

^f 13.41 Hab 1.5 ^g 13.47 Is 49.6

kit nijkulara, chiyura pailta payukima uzanapa. ⁴⁹Sunkana uspane Anpatpa watsal pit wan sura uzturuza kainanara. ⁵⁰Suasne Judío awaruzne sun pipuluras kwazpa ashamparuzakas kwazpa ampuruzakas wanmakkat kit kwinta kinara, Pablokasa Bernabékasa waya kianapa, uspa sukis ianapa. ⁵¹Suasne uspane mitti nukmu pul pil ulpian kit uspa kwail awakana mai annara. Suasne Iconio pipulura iilta. ⁵²Jesústa kammuruzne kwisha wat kulara. Sinam Izpulkas usparuza piznara.

Pablokas Bernabékas Iconio pipulura nappailta

14 ¹Iconio pipulukin Pablokas Bernabékas sulmin Judío awakasa kammu yalta nappailta. Kwinta kitpane, akkwan Judío awaruzkas Griego awaruzkas Dios pit miat kit nijkulara. ²Judío awa miashimtuchiruzne Judío awachiruzza kwinta kinara, Jesústa piantuzpa kwail minñanapa. ³Suain akkwan payurakima tut kit ishkwatchin Anpatpa pit kwinta kiilta. Anpatne usparuza kiwainnara, awa uspa kaizta aizpa piankamanapa. Uskas usparuza akkwan tuntu iztasparit kal kinpa kiwainnara. ⁴Akkwan pipulukis awaruzne nijkularachi. Mínpazha Judío awakasa nijkulara. Mamaztuzne Dios inintaruzkasa nijkulara. ⁵Suasne Judío awakas Judío awachiruzkas uspa ininturuzkas nijkulara, usparuza kwail kizana, uk kiana. ⁶Sun piankamarawane, pizamasakane, Pedrokas Bernabékas Licaonia surakas, mamaz kasha surakas, iilta, Listra pipulurakimakas, Derbe pipulurakimakas. ⁷Akkwan surakima uspane Dios watsal pit kainanara.

Awane Pablora uk kiamtu Listra pipulura

⁸Listra pipulukinne maza ampune, chasachimikane, tuara. Ka kawirit akwa, sua uzara. Usne mizurainkas chatchi. ⁹Sun ampune Pablo kaizta aizpa mĩmtuara. Pablone ussa iz kit us nijkultu aizpa piankamta. Usne ka minta: “Usne nawa wat kakulninshinasa,” minta. ¹⁰Suasne Pablone tinta ka kaizta:

—Kuksak kit mitti nil kunti, kizta.

Sun ampune tizak kit chamizta. ¹¹Akkwan awane Pablo kit aizpa izat kit Licaonia pitkasa ka kwianamizta:

—Diostuz awakana namarit. Uspane kwashtas aumiza taizara, kizara.

¹²Uspane Bernabé “Zeus dios i” munara. Pablo akkwan kwinta kit akwa, usne “Hermes dios i” munara. ¹³Zeuspa pari-

yane pipulu napmukin paiña wanmakmu yal mijara. Usne wakara ampuruzkas kwisha akkwan wishkas karara. Usne awakasa wakara ampuruza uspa akwa piantashit kit usparuza wakpuj wainñashimtuara. 14 Sun nijkultazasmin, Pablokas Bernabékas uspa pñ pihshailta, uspa kiamtu aizpa watchi piankamanapa. Awaruzpain nappail kit kwianara:

15—Awaruz, ¿Chikishma sun kipus? Aune ampu ukanain makpas. Aune at kit Dios watsal pit kainammpuspas, u sun kiamtu aizpa chihkanapa. Chiwal palichi. U kiamtu aizpa chihkat kit Dios chiyura uzmikasha miat kit kanparain. Usne wan sara. Chiyukas pilkas pikas wan chiwal sara. 16 An ñamin Diosne pailta awara chihkanara, uspain miwara naat kit chaanapa. 17 Mizurainkas usne aumiza chihkanarachi. Dios wat aumiza kinamtu akwa, usne aumiza wat kinamtu, ussa piankamanapa. Diosne alukas chiyuras kininta, pippa pakuwiznapa. Usne uruza akkwan kumira kwinnara, kuanpa, wat kulanapa.

18 Sun wan kwinta kitkas, awane mama uspa akwa wakara piantashiara, usparuza wakpuj wainñanapa.

19 Suasne minpazha Judío awaruz Antioquía pipuluraskas Iconio pipuluraskas piannaakane, uspane uspa minñamtu aizpa



Cristora nijkulturuz Pablora kiwainñamtu, chanpa

maizara. Suasne uspane Pablora uk kiara. Us irit minñamtu akwa, uspane ussa tain kit kininaara pipulu pianamalkima. 20 Jesústa piantuz Pablo tukin wanmakkarawane, Pablone kuh-sak kit mamasa pipulura napta. Tilawara usne Bernabékasa Derbe pipulura iilta.

21 Dios pit kainanarawane, akkwan Derbe pipulura uztuzne Jesústa piankamara. Kwiztane uspane Listarakas Iconiorakas Antioquíarakas kailtailta. 22 Uspane wan surakima Jesústa piantuza kwisha kiwainat kit kurunara, Jesústa wat nijkulamiz-
napa, us kaizta aizpa mianapa. Dios inintukin nappashimturuz-
ne kwisha naizarinazi kiznara. 23 Uspane ilaparuzana nanara, wan
pipulura wanmakmukin Dios pit kamtananapa, Diosta piantuza
kurunnanapa. Kumira kumtuchiasmin, Diosta paikuat kit Jesús-
ta nijkulturuza kurunara, Anpatpa miwara ianapa.

Pablokas Bernabékas Antioquía pipulura kailtailta

24 Pisidia sukimin pinpailtawane, Panfilia sura pianailta. 25 Perge pipulukin uzturuza sun pit kainanarawane, uspane Ati-
lia pipulura kihshtailta. 26 Suane kanuara wail kit Antioquía pi-
pulura iilta. Sun pipulukin an ñamin Jesústa piantuzne Diosta
uspa akwa paikuara, Dios usparuza kiwainanapa. Suasne uspa-
ne paasta sun kal kinpa ininñara. Mane uspa kal kapal wan kirit. 27
Antioquía pipulura piannailtawane, uspane wanmakmuruza
wanmakninñara, Dios yawa usparuza kiwaintit aizpa kainana-
napa. Uspane Judío awachiruzkas Jesústa nijkularit kainanara. 28
Suane Pablokas Bernabékas Cristora kanpamtuzkasa akkwan
payukima nukkulpailta.

Jerusalén pipulura wanmakkara

15 1 Sun payune minpazha Judea sukis Antioquía pipulura
attuzne Diosta piantuza kamtanamizta. Uspane ka kaiz-
nara: “Moisés ampu pashpa aya tit kit circuncisión kiarawa kiz-
ara.” Moisés ininta aizpa kimtukine, Diosne uruza watsat milna-
manazi kiznara. 2 Sun akwa, Pablokas Bernabékas uspakasa tin-
ta kwinta kiara. Suasne wanmakturuzne Pablorkas Bernabé-
kas minpazharakas nanara, Jerusalén pipulura ianapa, ininta-
ruzkasakas iglesiaras ilaparuzkasakas sunpa parananapa.

3 Antioquía pipuluras wanmakmuruzne usparuza ininñara. Fenicia suwarainkas Samaria suwarainkas pinamtuasmin, uspa-

ne Judío awachiruz antikwa pit miara aizpa chihkarit kwinta kiara, Diosta kanpaanapa. Sun pit miarawane, wan Cristora piantuzne watsal kulara.

4Pablokas Bernabékas Jerusalén pipulura piannaitawane, wanmakmuruzkasakas inintaruzkasakas ilaparuzkasakas wanmakkat kit Dios kit aizpa usparuza kainanara. 5Minpazha Fariseo awaruzne, Jesústa nijkulturuzne, nil kuhspanak kit kaizamizta:

—Judío awachiruzne, Jesústa nijkulturuzne, wan Moisés inintit aizpa kiarawa. Uspane uspa ampu pashparuza circunci-sión kiarawa, kizara.

6Suasne inintaruzkas ilapa inintuzkas wanmakkara, sun pit iz kit piankamana. 7Kwisha kwinta kiarawane, tinta mimarawane, Pedrone kuhs kit usparuza kaiznara:

—U Diosta piantuz, mirain. Une ñamin Dios uruztas nawa narit pian. Suasne Diosne nawa ininta, Dios watsal pit Judío awachiruzza kainananapa, Anpatta nijkulanapa. 8Diosne wan awa kajchukin minñamtu aizpa pian. Diosta pashinamturuza nanat kit Sinam Izpulta ininta, usparuza aumizakanain piznanapa. 9Usne aumizakas usparuzakas kawarain kinarit. Uspa Dios-ta nijkularit akwa, Diosne uspa kwail kiarit aizpa sinam kwizninnarit. 10Mane, ¿Une Dios Judío awachiruzza sun kianapa ininshimtumakkiwas? Une usparuza ininnasachi, chiwazha anza sam kianapa. Aukas au an ña kwaltuzkas sun kitsachimakpas. 11Sunkana kiman. Aune Dios Jesús akwa aumiza watsat milnamtit nijkultamakpas. Kawarain Diosne usparuza pashinat kit watsat milnara.

12Suasne wanne puñain paat kit Bernabékas Pablokas kwinta kit aizpa miara. Uspane Dios chiwazha watsal iztasparit kal kiarit aizpa Judío awachiruz iztakin kainanara. 13Kwinta kitpane, Santiagone kaiznara:

—U Diosta piantuz, mizhain. 14Simón Pedrone miza Dios Judío awachiruzza ñamin kiwainara aumiza kainanara. Diosne usparuza nanara, paiña kwalkas namanapa. 15Dios pit kainammtuz pararawane, uspane sun kwinta kiara. Dios pinkihkin ka para:

16“Sun kitpane, nane mamaz payura kailnash,
minpazhara, David mikwarakana, uzninnapa.

Mazara, Davidpa kwalkis kakulninnash.

Nukkultitmikasha mamasa kakulanash. Nane kail kit
Jesústa kakulninnash,

17 wan nukkultaruzkas wan Judío awachiruzkas Anpatta sayanapa,
Diosta piantuzkasa wanmakkanapa, usparuza ininnanapa.

18 Anpatne, an ñamin kaiztamikane,
sunkana paiña pit kaiz kit awaruza
piankamninnara.”^h

19 Katmizna Santiagone min kit ka kurunnamizta: Aune Judío awachiruza, Diosta piantuza, tinta inintachiwamakpas, Moisés Judío awaruza inintit aizpa mianapa. Mane uspane ñamin nijkularit aizpa chihkaarawa, Diosta kanpaana. 20 Aune usparuza ka parawamakpas: “Awakanain iztit saritta tira kumira unatne, kuman. Kasarakiritne mamaz ashampara sanachi. Kawarain ashampane mamazpa ampukasa pitsachi. Chiwazha tit kuhtit kalpa irane, aimpi puztakine, ña kuman. Kalpa pi kwaritne, kuman. Aimpikas kuman.” 21 Ñamin minpazhane pailta kwaizkulmu payura Moisés kamtamtu aizpa iz kit wan pipulura wan kammu yalta kamtanara.

Uspane pinkih panat kit Judío awachiruza ininñara

22 Suasne inintaruzkas wan ilaparuzkas wan wanmakmuruzkasa minpazharuza usparuztas naat kit Antioquía pipulura innara Pablokasakas Bernabékasakas. Uspane Judas, Barsabás muntimikashakas, Silastakas ininñara. An paasne aimpishtuztas katsa namtit. 23 Uspane uspakasa sun pinkih ininñara:

Aune, inintaruzkas, ilapa Diosta piantuzkas
Judío awachiruzakas Antioquía pipulura uztuzakas Siria sura uztuzakas Cilicia sura uztuzakas
“kakishapu” kizpuspas.

24 Minpazha auruztas iarakas, aune usparuza innarachimakpas. Uspane uruza uspa pitkasain kwail kizapat kit naaninnara, uspa Moisés kamtit aizpa mianapa. 25 Katmizna au wanne nijmin kit minpazharuza auruztas nanaramakpas, uruza izna ñanapa. Uspane, au paas wat aimpishtuzkas, Bernabékas Pablokas, ñanazi. 26 Awa usparuza piantashiarakas, au Anpat Jesucristone usparuza

^h 15.18 Am 9.11-12

wat kiwainara. **27** Sun akwa, aune Judastakas Silastakas uruza inintamakpas, uspa pitkasa sunpa kwinta kianapa, u sun pinkih para aizpa piankamanapa. **28** Sinam Izpulkas aukas nijminmakpas, au uruza sunmin kuruntu aizpa kianapa. Aune uruza chinkas ininmanash. **29** Awakanain iztit saritta tira ña unaritne, kuman. Kawarain aimpikas kuman. Chiwazha kalpa tit kuhtit aimpi puztakine, ña kuman. Kasarakiritne, mamaz ashampara sanachi. Kawarain ashampane mamazpa ampukasa pitsachi. Au kaizta aizpa kitne, une wat aizpa kianazi.

Watmin ianaka.

30 Sunkana kiztawane, uspane masain iat kit Antioquía pipulura piannaara. Suane uspane wanmakmuruzkasa wanmakkat kit pinkih chihkaara. **31** Aimpihstuz pinkihta izarawane, kwisha wat kulara, sun pinkih usparuza kiwainara akwa. **32** Judaskas Silaskas Dios kainammika tuasmin, uspane akkwan payukima uspa pitkasain Diosta pianturuz Dios pit kamtanat kit tinta kiwainnara, tinta namanapa. **33** Sua akkwan payu pailtikane, aimpihstuzne usparuza “iru” kiznara. “Watmin ianaka” kizkane, uspane inintaruzpara kaiyara. **34** Silasmin mama suain nukulta. **35** Pablokas Bernabékas mamaz akkwan awakas Antioquía pipulura nukkulara. Uspane awaruza kamtanamiz kit Anpatpa pit kainanamizta.

Pablokas Bernabékas paimpa paimpa iilta

36 Akkwan payu taiztawane, Pablone Bernabéra kaizta:

—Wan pipulura ñamin iarittain kailmizpai, Diosta piantuza iznana. Anpatpa pit miraruza imizpai, usparuza mamasa kiwainnana.

37 Bernabéne Juanta uspakasa mishira. Usne Marcoskas muntit. **38** Pablone ussa mishitchi, Panfilia pipulura usparuza tiwiji it akwa, uspakasa mama kal kiwaintachi akwa. **39** Tinta kwinta kiarawane, tinta pilchapuzarawane, uspane paimpa paimpa iilta. Bernabéne Marcosta mit kit kanuara waat kit Chi-pre sura iilta. **40** Pablone Silasta nara, uskasa in. Aimpihstuzne uspa akwa Diosta paikuara, Dios usparuza kiwainapa. Sun kitpane, iilta. **41** Uspane Siria suwarakas Cilicia suwarakas pinpailta, wanmakmukin izmuruza kamtailnapa, Dios pit an wat piankamanapa.

Timoteone Pablorkas Silastakas kanpara

16 ¹Derbe pipuluwara pintawane, Pablone Listra pipulura piannara. Suane usne mazakasa, Timoteo muntitmikakasa, wanmalta. Usne Dios pit nijkulta. Paiña Judío awa akukshne Jesússta nijkultumika azi. Paiña papihshne Griego awa azi. ²Jesústa piantuz Listra pipulura uztuzkas Iconio pipulura uztuzkas us akwa wat kwinta kiara. ³Pablone Timoteora kanpazha kizta. Judío awa sun sura uzara akwa, Pablone paiña aya titnin kit circuncisión kira. Uspane Timoteowa papihsh Griego awa azi pian. Sun Griego awane sun circuncisión kitchi. ⁴Wan pipulura pinamtasmin, uspane Jesússta piantuza inintaruz nijkularit aizpa kamtanara. Jerusalén pipuluras ilapa inintuz kaizara aizpa kamtanara, wan wat mianapa. ⁵Sunkanane wanmakaturuzne an nil kiat kit an wat nijkulara. Jesússta piantuzne pailta payu an akkwan wanmakkamizta.

Macedonia pipulu awane Pablora izpanta

⁶Sinam Izpulne Pablorkas paiña kanpamtuzakas Asia sura Dios pit kainana ininnarachi. Frigia suwarakas Galacia suwarakas pintawane, ⁷uspane Misia sumamin pianaara. Bitinia sura napna minñakane, Jesússta Izpulne usparuza napninnarachi. ⁸Suasne Misia suwara pinat kit Troas pipulura pimara kihshara. ⁹Suane Pablone amtawara chiwazha kinkizpara. Maza Mace-



Pablo pittuasmin, Macedonia suras awa paiña kamakin kuntu

donia suras awane ussa izpanta. Usne kun kit Pablora paikwat kit kaizta: “Macedonia sura anka, aumiza kiwainnapa,” kizta. **10** Pablo kainkizparawane, nane, Lucasne, Pablokasa wan wat-saiznash, Macedonia sura in. Aune Dios aumiza ininta pianaisnash, Dios watsal pit kainanana.

Pablokas Silaskas Filipos pipulura imtuwaiyazi

11 Aune Troaskis kanuara nil iaiznash, Samotraciara pi paizka sura piannan. Tilawara Neápolis pipulura pianaisnash. **12** Suas Filipos pipulura iaiznash. An pipulune Macedonia sukin anza katsa azi. Akkwan Roma pipulukis awaruzne sua uzara. Suane akkwan payuchikimain tumanash. **13** Aune kwaizkulmu payu pipulukis pianamal puzisnash pirakima, awa wanmakmukin piannan. Sua awane Diosta paikumkin iara. Sua aune uz kit ashampa wanmaktittuza Dios watsal pit kwinta kianash. **14** Maza ashampane, usparuztas Lidia muntit. Usne Tiatira pipulukis at kit sam ishtam pñ paininmika azi. Sun ashampane Diosta wakpuj wain kit paikwara. Uspa kaizara aizpa mira. Anpatne ussa kiwainta, Pablo kamta aizpa nijkulnapa. **15** Sun ashampakas paiña kwalkas munrarawane, usne aumiza paikwat kit kaizpailnash:

—Nawa nil Anpatta nijkultamika ish minñamtune, ap yalta uzrain, kiznara.

Usne aumiza nukkulninpailnash.

16 Maza payune Diosta paikumkin au iamtuasmin, aune saliz piztit kiwaim ashampara wanmalaiznash. Salizne ussa kiwainta, iznakulan. Us iznakulamtu akwa, paiña anpattuzne akkwan pial kana kiara. **17** An nimpish ashampane Pablorkas aumizakas kanpat kit kwian kit saliz akwa ka kaizta:

—An ampuruzne an katsa Diosta kiwainñamtu. Uspane usparuza sun pit kainanamiztu, Dios uruza watsal minnanapa, kizta.

18 Nimpish ashampane sunkana kira akkwan payukima. Piztit ashampa ussa naizninta akwa, minpara Pablone salizta kaizta:

—Jesús nawa kiwaintu akwa, nane nua puznintus, ashamparas puznapa.

Sun urain salizne ustad tiwij ira.

19 Ashampara pamikaruzne ka minñat kit nijkulara: “Saliz puztit akwa, aune an ashampakasa an pial kana kisachimak-

pas.” Sun minñarawane, uspane Pablorkas Silastakas pizat kit p̄ipulu inintuza nankin m̄lara. ²⁰Uspane usparuza katsa mi-kwawakin karat kit kaizara:

—An awaruzne aumiza kiwainamtuchi. Auruzpain pilcham-puzamtu. Aumiza paimpa naiyamtu. An ampuruzne Judío awa mai. ²¹Aune Roma awa makpas. Aune uspa kamtara aizpa sapsachimakpas. Uspa kamtara aizpa kisachimakpas.

²²Suasne awane usparuza aim kiamizta. Katsa mikwane p̄in uknapa ininnara, tikasa pianna. ²³Kwisha aim kiarawane, kajchira sippat kit kajchi izmumikasha usparuza kwisha wat izanapa ininta. ²⁴Sunkana kizkane, kajchi izmumikane usparuza anza ayukmal sipnat kit mitti tikulta nukninta.

²⁵Kakwamta panakima Pablorkas Silaskas Diosta paikwamtuaiyasmin, Diosta kanta kiztuaiyasmin, mamaz siptit waruzne miara. ²⁶Suasne masain su ulmu amizta. Kajchi yal sakti kwisha tinta ulmalta. Sun urain wan p̄jta azkulara. Wan cadena kuhtittuz sipnaruzza chihtkul kit taizara. ²⁷Sun kirikane, kajchi izmumikane sun kit aizpa izkulata. Kajchi p̄jta chihtkulara iztawane, usne paiña mashti pizta, usmin piantana. Maza siptitmi-ka kajchiras puzkane, paiña mikwane, ussa kajchi izmumikasha, piantashina. Usne wan siptittuz kajchira waruzza chihtaraka minta. ²⁸Pablone ussa kwianta:

—Nua kwail kimun. Wan akki puramakpas.

²⁹Suasne izmumikane impil paikwat kit kajchira ayukta ãin it kit napta. Ul kit ishkuhtuasmin, Pablo tukinkas Silas tukinkas wakpuj wainta. ³⁰Usne usparuza tas ukkanat kit m̄lara:

—Anpattuz. ¿Chima kinpai, Dios nawa watsat m̄lnapa?

³¹Uspane sinkailta:

—Anpat Jesucristora nijkultane, Diosne nua watsat m̄lnazi. Up kwaltakas watsat m̄lnanazi, kizara.

³²Pablorkas Silaskas Anpatpa pit ussakas paiña yalkin uztuzakas kaizpailta. ³³Sun amtain izmumikane usparuza mamaz p̄jtamal m̄lnara, aim kirit kitna. Suasne uspane ussakas paiña kwaltakas munnanara. ³⁴Kwiztane paiña yalta m̄lnat kit kumira kwinara. Uskas paiña kwaltuzkas kwisha wat kulara, Diosta nijkulara akwa.

³⁵Tilawain tilawara mikwane policíaruza kajchi izmumikasha ininnara, paasta chihtnanapa. ³⁶Suasne kajchi izmumikane Pablora it kit kaizta:

—Mikwane nawa ininziish, umiza chihtnapa. Une puzshinai, puñain iilnapa.

37 Pablone policíaruza kaiznara:

—Mikwane aumiza wan iztukin tikasa piannara. Au Roma pipulukis awa akwa, uspane amiza sunkana kinchi. Aumiza kwail kizarachasmin, uspane aumiza kajchira sipparit. Mane uspane puintain aumiza chihtashimtu. Sunkana kiasachi. Us-pain anpa, aumiza puzninnapa, kiznara.

38 Policíane mikwaruza sun kainanara. Roma pipulukis awa-ra ilita akwa, uspane ishkuat **39** kit Pablorkas Silastakas iara, sun kwail kiarit kizna. Suasne kajchira aat kit usparuza pai-kwaara: “Pipulukis irain.” **40** Kajchiras puzpailtawane, Pablor-kas Silaskas Lidiawa yalta iilta. Izmuruza iznarawane, wantuza wat kiwaintawane, pipulukis puz kit iilta.

Awane aliz kulamtu, Pablo kaizta akwa

17 ¹ Anfípolis pipulukimin Apolonia pipulukimin pinpailta-wane, Pablorokas Silaskas Tesalónica pipulura piannailta, Judío awa kammu yalkinkima. ² Pablone kammu yalta sunkana kamtit kamtanamizta. Kutña domingokima pailta kwaizkulmu payura uspakasa kwinta kinat kit Dios pit kamtanara. ³ Usne Dios pit iz kit usparuza piankamninara: “Cristo naiznatkin. Ira-wane, mamasa kakulnatkin.” Ka kaiznara: “Sun Jesúsmin uruza na kaiztu aizpa Dios inintamika i.”

⁴ Suasne minpazha Judío awane Jesússta nijkulat kit Pablorkas Silastakas wanmakkara. Akkwan Griego awa Diosta wakpuj wain-turuzkas akkwan kwazpa ashampa wat kirittuzkas Jesússta nijkula-ra. ⁵ Judío awa Jesússta nijkultachiruzne aliz kulara, akkwan awa Pablo kaizta aizpa miara akwa. Uspane minpazha arakan awaruza wanmakninara, wan awa pilchapuzninamiznapa. Jasónpa yalta azain iat kit pijta pakpak kiara, Pablorkas Silastakas sayat kit uk-kat kit awaruza chihkaanapa. ⁶ Sua usparuza wanmalmanamtika-ne, Jasóntakas izmuruzakas pipulu inintuzakima tain iat kit kwia-nara: “An awane wan sura maizninamtu; mane apakas ailta. ⁷ Ja-sónne usparuza paiña yalta nammilara. Uspane au mikwa Cesar kaizta aizpa miamtuchi. Mamaz an katsa mikwa ininna arit kizam-tu. Usne Jesús muntit,” kizara.

⁸ Sun miarawane, awakas inintuzkas pilchapuzara. ⁹ Jasón-kas mamazkas usparuza pial tarawane, usparuza chihtnara.

Pablokas Silaskas Berea pipulura imtas

10 Til pakane, izmuruzne Pablorkas Silastakas puznin kit Berea pipulura ininñara. Piannailtawane, Judío kammu yalta iilta. 11 An Judío awane Tesalónica awakinkas anza wat ma-zi. Pailta payu Dios pit miamtuasmin, uspane Dios pinkihta parit aizpa izara. Pablo kaizta aizpa piankamshiara. 12 Katmizna akkwanne nijkulara. Usparuztas akkwan kwazpa Griego awakas akkwan kwazpa Griego ashampa wat kirittuzkas nijkulara. 13 Pablone Berea pipulura Dios pit kainanamizta. Judío awa Tesalónica pipuluras sunpa nijkularawane, uspane ta iat kit awara pilchapuzninñara. 14 Paiña izmuruzne Pablora tiriztachi ininñara, katsa pimara tuanpa. Silaskas Timoteokas Berea pipulura nukkultailta. 15 Pablora kanpararuzne Atenas pipulurakima kanpaara. Pablone kailtaruza paiña pit ininta, Silaskas Timoteokas azain kail kit uskasa wanmaknapa.


Pablone Atenas pipulura tu

16 Silastakas Timoteorakas tiriztuasmin, Pablone Atenas pipulura mat kit kwisha tayalta, wan awa akkwan ti awakana saritta wakpuj wainñamtu akwa. 17 Katmizna usne Judío kammu yalta nap kit Judío awaruza tinta paranara. Mamaz Griego awaruzakas, Diosta piantuza paranara. Pailta payu kumira paininmukin, awa imkin wanmakturuza paranara. 18 Minpazha kamtamtuzne epicúreo munara. Mamaz kamtamtuzne estoicos munara. Uspane Pablokasa kwinta kiamizta. Minpazha usparuzpain mimara: “An ampune kain paramtu. Usne nukukana tinta paramtui.” Mamaztuzne ka kaizara: “Usne mamaz diospa kamtamtu.

Uspane sun kwinta kiara, Pablo watsal pit Jesúska kainara akwa. Uskas awa irittas kakultu kainammizta.” 19 Suasne uspane ussa Areópago izakin, uspa wanmakmukin, milaara. Sua ussa ka mimaara:

20 —¿Nu masas kamtam kamtamtu aizpa aumiza kamtashinakish? Nune aumiza mamaz tuntukanain kainammtu. Sun wan nu kainammtu aizpa piankamshipuspas, kizara.

21 Wan Atenas pipulu awakas mamaz suras awa sua uztuzkas chiwazha masas kwinta kirit aizpa miashimtu. Chiwazha masas pit miamtu aizpa kwinta kiashimtu.



Pablo mamaz diospa misharikin kuntu

22 Suasne Pablone uspa paizkakin Areópago izakin kun kit kaiznara: “Atenas uzturuz mizhain. Nane u ti awakana saritkin wakpuj wainñamtu pianish. 23 Na u wakpuj waimtukin u wanmakmukin chasmin, nane u chiwazha katsa ukkasa saritkin wanmaltau. Sua sun pit ukkin parit: AN DIOSTA PIANCHIMAKPAS. U sun Diosta wakpuj wainñarakas, une ussa pianchi. Nane uruza sun Diospa kainanamtus.

24 An Diosne au su sara. Chiwazha an sura wa aizpa us sara. Usne chiyukas pilkas pamika i. Usne wakpuj wainmu yalkin awa sarakin uzchi. 25 Sun awa ussa kiwainsachikas, Diosne pailta awaruza uzninnara. Ishkas wan chiwalkas aumiza milanara.

26 Maza ampu sarawane, Diosne wan awara sara, wan chival sura uzanapa. Usparuza sarachasmin, Diosne an ñancha mintá awa uznakas yawa añora uznakas nanara. 27 Diosne sun kirit, awa ussa sayanapa. Ussa sayarane, une Diosta wanmalashina. Watcha Diosne au kashain uz. 28 Usne aumiza uzninamtu. Usne aumiza ininamtu. Us akwa uzmakpas. Minpazha u kainammikane ka kaizara: ‘Aune Diospa kwal makpas.’ 29 Aune Diospa kwal makpas kizamtune, aune Dios chiwazha saritkana kizsachimakpas. Dios urukasakas pialkasakas ukkasakas sarit i mintachiwamakpas. Awane uspain minñamtu aizpa sara. 30 An ñancha Dios wan kwail awa kirit aizpa ilnarachikas, mane Diosne wan awa pailta sura uzturuza ininamtu, kwail kiarit aizpa

maizanapa. **31** Katmizna Diosne maza payura nara, wan awaruza nil ilnana. Sun payu taizkane, Diosne Jesús akwa, us narit-mika akwa, wan awaruza ilnanazi. Diosne ussa irittas kakulninta, wan awane ussa izat kit piankamanapa.”

32 Awa irittas kakultu miarawane, minpazha sunta ishanara. Mamaztuzne ka kaizara:

—Mamaz payu sun paraka miaiznapas.

33 Suasne Pablone uspa paizkakis puzta. **34** Minpazha awane ussa kanpaat kit nijkulara. Dionisione, Areópago ininmikane, nijkulta. Maza ashampakas, Dámaris muntitmikakas, mamaztuzkas nijkulara.

Pablone Corinto pipulura Dios Pit kainammtu

18 ¹ Areópago izakin kwinta kitpane, Pablone Atenas pipuluras puz kit Corinto pipulura ira. ² Suane usne maza Judío awara wanmalta. Usne Aquila muntit. Usne Ponto suras arit. An ñamin akkwan payuchin uskas paiña ashampa Priscilakas Italia suras ailta. Katsa mikwane, Claudione, Roma pipulukis wan Judío awara ininnara, wan puzanapa. Sun akwa, Aquilakas paiña ashampakas Corinto pipulura pianailta. Pablone usparuza iznana ira. ³ Sun kalmin kal kiamtuasmin, usne usparuzkasa mara, sulmin nain pñkasa yal sana. ⁴ Pailta kwaizkulmu payura Pablone Judío kammu yalta ira, tinta kwinta kinana. Usne Judío awaruzakas Judío awachiruzakas us kamta aizpa mininnara.

⁵ Silaskas Timoteokas Macedonia suras piannailtawane, Pablone Dios pitmin kainanamizta. Judío awaruza nil kiznara, Jesúsne Dios inintamika azi kiz kit. ⁶ Uspane ussa alizwazha sinkaamizta. Kwail pit paraamizta. Suasne Pablone paiña pñn ulpian kit Judío awaruza kwainattattinash kiz kit kiznara:

—Une umin iashitne, une iashina. Nane sinam ish. Nane uruza kuruntu aizpa pianish. Makis nane Judío awachiruza kamtana imtus, kiznara.

⁷ Judío awa kammu yaltas puz kit Ticio Justowa yalta napta. Usne kammu yalmamin uz kit Diosta paikwara. ⁸ Crispone, kammu yal ininmikane, paiña kwalkasa Anpatta nijkulara. Akkwan Corinto awakas Dios pit miarawane, uspane nijkulat kit munarit. ⁹ Suasne Anpatne Pablora izpan kit kaizta: “Ishkumun. Dios pit kainanamizti, puñachin. ¹⁰ Nane nukasa kiwainna

inash. Minminkas apa nua iyamanazi, nua kwail kin. An pipulukin kwisha akkwanne nawa piankamanazi.” 11 Sunkana Pablone maza año kakwakasa Corinto pipulura tut kit Dios pit usparuza kamtanara.

12 Sun payu Galióne Acaya sukin katsa mikwa azi. Judío awaruzne wanmakkat kit Pablora aliz kulara. Ussa pizat kit katsa mikwakin milat kit 13 katsa mikwara kaizara:

—An ampune wan awara kurunamtu cha, mamaz tuntu Diosta wakpuj wain kit Diosta paikwan. Moisés aumiza sunkana inintachi. Aune sunkana kisachimakpas, kizara.

14 Pablo kwinta kimtuasmin, Galióne Judío awaruza kaizara:

—Us gobiernora kwail kitne, us awara kwail kitne, nane u Judío awaruz kaizara aizpa mirawaish. 15 Une kamtampakas awawakas uruzpa inintu aizpakas paraamtu. Umin nil sarain. Nane nil aizpakas kwail aizpakas kaizmanash. Na u kamtamtu aizpakas u nijkulamtu aizpakas we piankamtit akwa, nane chinikas kizsachish.

16 Galióne usparuza pianamal ininnara. 17 Suasne wan Griego awane Sóstenesta, Judío kammu yal ininmikasha, pizat kit suain katsa mikawakin aim kiara. Galióne sun izkitchi.

Pablone Antioquía pipulura kailtu

18 Pablone Corinto pipulura mama akkwan payukima nukulta. Izmuruza “iru” kiznarawane, kanuara waat kit Siria surakima ira. Priscilakas Aquilakas iilta. Cencrea pipulura, kanuara waarachasmin, Pablone paiña kizpu ash chiwal kihta, us Diosta sun kin namta aizpa kin. 19 Éfeso pipulura pianaarawane, Pablone Priscilarakas Aquilarakas tiwij it kit Judío kammu yalta ira. Judío wanmakmuruza paranara. 20 Uspane ussa paikuara, an akkwan payukima tuanpa. Nukkulshitchi. 21 Suasne “iru” kiznat kit kaiznara: “(Nane Jerusalén pipulurain tuatpaish, pishta izna). Dios nawa kiwaintane, mamasa kailnash, uruza iznana,” kiznara.

Suasne kanuara waat kit Éfeso pipulukis ira. 22 Cesarea pipulura piannatpane, Pablone Jerusalén pipulura ira, Dios pit pianutuza iznana. Kwiztane Antioquía pipulura ira. 23 Akkwan payuchi pailkane, Galacia surakas Frigia surakas wan pipuluruza ira, wan Jesústa piantuza kiwainnana.

Apolosne Éfeso pipulura uztuza Dios Pit kainanamtu

24 Sun payune Apolosne, Judío awane, Éfeso pipulura piannara. Usne Alejandría pipulura kawira. An wat kainanmikane Dios pit kwisha watsal parat kit Dios pit wat piankamta. 25 Mazane ussa Anpatpa miwa kamtara. Us pian aizpa kwisha wat kwinta kit kit Jesús pa nil kamtanara. Uspane sun payura Juan munnarit aizpa pianara. 26 Apolosne Judío kammu yalta kwinta kimizta, ishkwatchin. Priscilakas Aquilakas ussa miiltawane, uspane ussa paimpa mipail kit Dios pa miwa an nil kamtanailta. 27 Suasne Apolos Acaya sura pinshimtuasmin, izmuruzne ussa kiwainashit kit maza pinkih Jesús ta piantuza paranat kit ussa “watsal sappanaka” kiznara. Acaya sura piannatpane, usne Diosta nijkultuza kamtananara. Diosne ussa kwisha wat kiwainta, sun awa Jesús pa an piankama napa. 28 Apolosne Judío awara tinta kwinta kinara. Usne wan awa iztakin Judío awa ñanta minñarit aizpa piankaminnara. Uskas Dios pit pinkih para “Jesúsne Dios inintamika azi” kiz kit kamtanara.

Pablone Éfeso pipulura tu

19 ¹ Apolos Corinto pipulura tuasmin, Pablone inkal izara puz kit Éfeso pipulura pianara. Suane Jesús ta piantuza wanmal ² kit Pablone minanara:

—Diosta nijkulakane, ¿Paiña Sinam Izpul sappamanas?

Uspane sinkaara:

—Aune mizurainkas Dios paiña Sinam Izpulta inintu mirachimakpas.

³ Suasne Pablone mimanara:

—¿Chima pianmakpas? ¿Miza tuntuma munnamtuas?

Uspane sinkaara:

—Aune Juan awaruza munnara pianmakpas.

⁴ Pablone kaiznara:

—Watcha, Juanne kwail kirit maizturuzain munnanara. Uskas usparuza mamazta nijkularawa kaiznara. Usne awaruza kamtanara, Jesús ta, an paiña kwizta amtumikasha nijkulanapa.

⁵ Sun miarawane, Anpat Jesús ta nijkultuza munnarit. ⁶ Pablo paiña chihti uspa kizpukin paanakane, Sinam Izpulne usparuza piznara. Uspane mamaz tuntu pitkasa paraat kit Dios usparuza kaiznara aizpa kainaara. ⁷ Wan doce ampuruzne purazi.

8 Pablone kutña mishkima Judío kammu yalta imizta, Dios pit kainana. Wan awakasa ishkwatichin paranat kit Dios awaruza ininnashimtu aizpa piankaminnara. 9 Minpazha ussa parashitchi. Jesústa miashitchi. Uspañe, Jesústa pianchiruzne, awa purakin Diospa miwa kwail paraara. Suasne, Pablone usparuztas paimpa ira. Jesústa piantuza Tiranowa kammu yaltakima milnara. Suane pailta payu kwinta kinara. 10 Sunkana paas añokima kamtanara. Wan Asia sura uztuzne Anpat Jesús pa pit miara. Kawarain Judío awakas Judío awachikas miara.

Escevawa painkultuz

11 Diosne Pablo akwa kwisha akkwan iztasparit kal kira. 12 Sunkana kirit. Awane pairara kihamkas uspa pīnkas karaara, Pablo sun pīn paanapa. Suasne uspañe sun pīn inturuza milnara, usparuzta kakulninnanapa. Piztittuztas saliz puzninnara.

13 Minpazha wat chi Judío awane, saliztuza puznintuzne, Anpat Jesús pa mun kizshiamtu, salizta puzninna. Uspañe salizta kaizara: “Pablone Jesús pa kamtanara. Jesús pa mun kaiztu akwa, nakas uruza puzninnamtu,” kizara.

14 Siete painkulne ka kiara. Escevane, uspa Judío papihshne, pariya ininmika azi. 15 Sun kiakane, kwail salizne sinkanara: “Nane Jesústa pianish. Pablorkas pianish. ¿Une minma makpas?”

16 Masain kwail saliz piztitmikane usparuzta tiznat kit wanta tinta piannara. Usne aimpi puznakima kwisha aim kinat kit uspa pīn pihshanara. Usne yaltas pilitim iara. 17 Wan Éfesora uzturuzne, Judío awakas Judío awachikas, sun piankamat kit ishkuara. Uspañe Anpat Jesús pa wat minñat kit kwisha wari an akkwan piji kaizara.

18 Akkwan Jesústa nijkulturuzne aat kit uspa kwail an ñan-



Pablo Efeso awaruza iznamtu, kwail pīnkīh impaktamtuasmin

cha kiara aizpa Diosta kainaara. **19** Akkwan tañu kimtuzne uspa payara pinkih karaat kit wan awa iztakin ñnta paktaara. Uspa pinkih sunpawa muin wiantawane, cincuenta mil pial muin. **20** Sunkana an akkwan awane Anpatpa pit miashit kit an tinta Diosta nijkulara.

21 Sun kitpane, Pablone min kit Macedonia surakas Acaya surakas ishira. Kwiztane Jerusalén pipulura ishira. An kwiztane “nane Roma pipulurakas itpaish” kizta. **22** Suasne paasta, Timoteorakas Erastorakas, paiña kiwainmuruza Macedonia sura ininnara. Usmin akkwan payuchikima Asia sukin nukkulta.

Awane Éfeso pipulura tinta pilchapuzamtu

23 Sun payune awane Dios watsal pit akwa, masas mi akwa pilchapuzara. **24** Demetrione, chiwazha putchã pialkasa sammi-kane, awara pilchapuzninnara. Sun ampukas paiña kiwaintuzkas pucha pialkasa ainki yal saara. An ainki yalne Dianawa kassa yalkana iztit. Uspane maza ashampa diosta, Dianara wakpuj wainñara. Uspane kwisha akkwan pial kana kiara, sun yalkin paininta akwa. **25** Usne usparuzakas sun ainki kal kittuzakas wanmakninat kit usparuza kaiznara: “Izmuruz. Une au kalkasa kana kimtumakpas pian, wat uzanapa. **26** Une Pablo kaizta aizpa miara. An ampune au sarit diosne ‘Dios chi’ kiztu. Pablone sunkana kirit, au Éfeso pipulurakas wan Asia surakas au sarit diosta miamanpa. **27** Awa au kal kwail i kizarane, aune au kal kashinamakpas. Kawarain awane ashampa dios Dianawa yalta wakpuj wainshiamanazi. Watchi minñanazi. Awa Diana wat chi kizamizkane, Dianawa yalta wakpuj wainna iamanazi. Mane watcha wan awa Asia sura uztuzkas wan awa mamaz sura uztuzkas ussa wakpuj wainñamtu.”

28 Demetrio kaizta aizpa miarawane, uspane kwisha aliz kulat kit kwianara: “Au Diana, Éfeso pipuluras, kwisha wari,” kizara.

29 Suasne an akkwan awane Éfeso pipuluras kwianamizta. Uspane Gayorakas Aristarcorakas, Macedonia suras arittuza, piznara. An paasne Pablora kanpailta. Wanne uspa wanmakmu yaltakima usparuza tain kit ininnaara. **30** Pablone sua napshira, awara kwinta kinana. Jesústa pianturuzne ussa napninarachi. **31** Minpazha inintuzne, Asia suras attuzne, Pablowa izmuruzkas uspa pit ininñara, sua napmanpa. **32** Wanmakmukin tuasmin, mamaztuzne chiwazha kwianara. Mamaztuzne mamaz pit kwianara. Wan awa-

ne pilchapuzara. Anza akkwan awane chikishma wanmakkamtu wat pianchi. **33**Minpazha Judío awaruzne Alejandrora nuppainñara, awa paizkakin kunnat kit paranpa. Uspane Alejandrora pai kuara, uspa akwa kwinta kin. Alejandrone chihitkasa puñain kiznara, Judío awa akwa kwinta kin. **34**Us Judío awa i piankamara wane, uspane paas urakima ka kwianara: “Au Dianane, Éfeso pipuluras, kwisha wari,” kizara.

35Suasne pipuluwa pinkih pammikane wanta puñain paninat kit kaiznara: “Éfeso awaruz mirain. Wan awane ashampa dios Dianawa pian. Aune Dianawa yalta iztumakpas. Sua awa wakpuj wainñamtu. An Dianawa uk chiyuras taizta pianmakpas. **36**Minminkas sun kiritchi kisachi. Puñain parain. Chiwazha kwail kitchasmin, wat minñarawa. **37**An ampuruzne, u karaarittuzne, u diospa yalta kwail kizarachi. U ashampa diosta kwail paraarachi. **38**Katmizna Demetriokas uskasa kal kintuzkas minpazhara kwail kirit kizarane, katsa mikwara iarawa. Katsa mikwane u kaizamtu aizpa minazi. Suain it kit kwinta kitpa, mamazta kwail kirit kizna. **39**Mamaz tuntu kwinta kishitne, une katsa mikwa wanmakmukin iarawa. **40**Ma u sun kiarit akwa, Romano inintuzne aashina, u waya kiashimtu kizanapa. ‘Chikishma pilchapuzarit’ mimaakane, aune kain sinkasachimakpas,” kiznara. **41**Sun kiztawane, wanne wanmaktukis iara.

Pablone Macedonia surakas Grecia surakas imtu

20¹Pilchapuztu pailtawane, Pablone Jesústa piantuza akwanat kit kurunnara, usparuza kiwainna. Suasne “iru” kiz kit saya kwat kit Macedonia sura ira. **2**Wan pipuluwara imtuasmin, usne kaiznat kit Jesústa piantuza kiwainnara. Kwiztane Grecia sura piannara. **3**Suane kutña mishtakima tuara. Siria sura kanuara inpain pakane, usne Judío awaruz ussa kwail kishiamtu piankamta. Katmizna min kit pilparain kailta. Mamasa Macedonia suwarain pinta. **4**Sópater, Pirrowa painkulkas, Berea pipuluras, Aristarcokas, Segundokas Tesalónica pipuluras, Gayokas Derbe pipuluras, Timoteokas, Tíquicokas Asia suras, Trófimokas Asia suras, ussa kanpaara. **5**Sun izmuruzne an ñamin iat kit Troas pipulura aumiza tirizara. **6**Pishta pan kiñakasa kumchi pailtawane, aune Filipos pipulukis kanuawara puzwiznash. Cinco payura Troas pipulura pianaiznash. Suane siete payu maaiznash.

Pablone Troas pipulura uztuza iznana imtu


7 Sábado amtane aune Diosta piantuzkasa wanmakaiznash, kumira kwan. Suane Pablone Jesústa piantuza kamtanara. Tíla-wa imtu akwa, kakwamtakima akkwan pit paramizta. 8 Aune kwash yalta wanmaktit puranash. Suane akkwan impil aitzuara. 9 Euticone, musittune, kwashta izkulamkin uzta. Pablo akkwan urakima kamtamtuasmin, usne pitshimizta. Kwisha tinta pittawane, usne kwashtas izkulamkis taizta. Uspane iritmikasha piltas tainak kit kamara taara. 10 Suasne Pablone pulamal kihsh kit iritmikasha isalta tut kit sayakwara. Izmuruza kaiznara:

—Ishkuman. Irachi. Ka.

11-12 Uspane musittu iritmikasha kamin milat kit kwisha wat kulara. Suasne Pablone kail kit yalta napta. Kumira nailtawane, kuara. Pablone kinnakima kwinta kinara, inkima.

Troas pipuluras Mileto pipulura iamtu

13 Pablo pilpara ishimtuasmin, aune an ñancha kanuawara Aso pipulura iaiznash, sua Pablora wanmalna. 14 Asora wan-



Kanua pimamin uzamtu

maktawane, Pablone kanuara waat kit aukasa Mitilene pipulura iaiznash. ¹⁵ Suas puzarawane, tilawane Quío pipulumara pin-aiznash. Maza payu marawane, aune Samos pipulura kanua pianamkin pipulura pianaiznash. Trogilio pipulura kwaizkultawane, aune Mileto pipulura pianaiznash. ¹⁶ Asia sura akkwan payukima nukkultuchi akwa, Pablone Éfeso pipulura itchi. Usne masain Jerusalén pipulura piannashira, Pentacostés pishta suain tuan.

Pablone wanmakmu inintuza Éfeso pipuluras kainanamtu

¹⁷ Mileto pipulura mamtuasmin, Pablone wanmakmu inintuza Éfeso pipuluras akwanpa innnara. ¹⁸ Pianaakane, ka kaiznara: “Na uruzkasa uztuasmin, une na miza uzta wat pian. Sun payura Asia sura piannatpane, ¹⁹ nane kiwainmumikakana pailta payu Anpatta kiwainmiztau. Ap Anpatpa kal kimtuasmin, nane aztau, Judío awa nawa kwail kiashimtu akwa. ²⁰ Nane uruza wan kainanarau, uruza kiwainshimtu akwa. Wan awa purakinkas uspa yalkinkas Dios pit kainanat kit uruza kamtanarau. ²¹ Judío awaruzakas Judío awachiruzakas kainanarau, uspa kwail kiarit aizpa maizanapa, Anpat Jesucristora nijkulana-pa. ²² Mane Jerusalén pipulura ishimtus, Sinam Izpul nawa kaizta aizpa kin. Sua awa nawa kishiamtu aizpa pianchish. ²³ Wan pipulura na imtura, Sinam Izpulne nawa ka kaizchish: ‘Awa nawa kajchira sip kit tinta naizninanazi.’ ²⁴ Sun akwa, nane ishkumtuchish. Ishinas. Uzshinas. Chima kishinaka pianchish. Nane ap kal pailtau. Anpat Jesúska kal wan nawa chihkat aizpa kapal kirau. Dios watsal pit kainashinas, Dios awara wat kiwainanapa.

²⁵ Mane mirain. Nane uruza it kit Dios miza uruza ininshimtu kainanarau. Une nawa mamaz payura mizurainkas izamanazi. ²⁶ Katmizna nane uruza wan Dios nawa chihkarit aizpa kainanarau. Nane uruza wan kamtanarau. Minminkas nawa kwail kirit kizsachi. ²⁷ Nane uruza wan Dios kishimtu aizpa kainanarau. ²⁸ Katmizna mane une uruzpain iztain. Sinam Izpulne sun kal uruza chihkanarit, Diosta wanmakmuruzza iznat kit kiwainanapa. Diospa painkul irawane, paiña aimpi puztawane, Diosne awaruzza akwanara, wanmakkat kit paiña kwalkanain uzanapa. ²⁹ Na ikane, mamaz kwail kamtamtuzne, inkal kwizakanane, anazi, Diosta piantuza kwail kianapa, nil chi kamtana-

napa. ³⁰Minpazha uruzpain p̄irail kaizat kit kamtaanazi, Jesús-ta piantuza watcha miamanpa, usparuzain kanpaanapa. ³¹Uruzpain iztain. Nijkultain. Nane kutña añokima amtakas payukas wan uruza kurunarau. U akwa az kit naiztau.

³²Mane, Cristora piantuz mirain. Minpara nane Diosta paikumtus, Dios uruza iznanapa. Diosta paikumtus, paiña watsal pit uruza nil uzninnanapa, us kin namt̄it aizpa sappanapa. Dios-ne ussa chihkamturuza kiwainnanazi. ³³Nane mamazpa pialkas mamazpa urukas mamazpa p̄inkas pashitchish. ³⁴Sunkana ap chihtikasain tinta kal kirau, ap pialkasain chiwazha na we aizpa paina. Nakas ap izmuruz we aizpa usparuza milanarau. ³⁵Nane pailta payu uruza sunkana kamtanarau, kal kiaiznapa, we mijtuza kiwainanapa. Anpat Jesús-pa pit kaizta aizpa mirain: ‘Mamaztuza milamtumikane anza wat kulnazi. Saptumikane anza wat kulmanazi.’”

³⁶Sunkana awara kaiznarawane, Pablone wakpuj wain kit Diosta uspa akwa paikwara. ³⁷Wantuzne azat kit Pablora saya kwaara, “iru” kizka. ³⁸U nawa chinkas izamanazi kiznara akwa, uspane kwisha tayalara. Suasne ussa kanpaara kanuara-kima.

Pablone Jerusalén pipulura imtu

21 ¹Izmuruza tiwij itpane, aune kanuara waat kit Cos sura masain nil iaiznash. Tilawara Rodas sura iaiznash. Suasne Pátarara pipulura pianaignash. ²Suane Fenicia sura imtu kanua wanmalaiznash. Waat kit iaiznash. ³Chipre su pi paizkakin pintuasmin, sun sura au puiyawara izat kit p̄inaiznash, Siria surakima. Kwiztane Tiro pipulura pimakin pianaignash, sua chiwazha kanuara wa aizpa chihkan. ⁴Aune Jesús-ta piantuza wanmal kit siete payukima maaiznash. Uspane Dios-pa Izpul kaizta aizpa Pablora kaizara: “Jerusalén pipulura isachi,” kizara. ⁵Siete payu wan kapal marawane, Tiro pipuluras iaiznash. Wan Jesús-ta piantuzne, wan ashampakasa pashpakasa auruza kanpaara pipulumarakima. Suane pi ksuikin wakpuj wainñat kit Diosta paikuanash. ⁶Suasne saya kwaan kit “iru” kiztawane, kanuara waiznash. Uspane uspa yaltain kaiyara.

⁷Tiro pipuluras kanuawara iat kit minpara Tolemaida pipulura pianaignash. Suane aune Diosta piantuza “kakishapu” kizaignash. Uspakasa maza payuin nukkulanash. ⁸Tilawara Pablo-

kas uskasa imtuzkas tas iat kit Cesarea pipulura pianaiznash. Suane aune Felipeya yaltakima iaiznash, uskasa mana. Inintaruzne ussa naarit, Dios watsal pit kainammika namnapa. Usne siete narittuztas ara. ⁹Felipene ampara pashu mijara. Uspane kasara kiarachi. Uspane Dios kaiznara aizpa kainanara. ¹⁰Akwana payu chikima Cesarea pipulura purasmin, Agabone, Dios kainammikane, Judea suras ¹¹aumiza iznana ara. Pablowa aya kira piz kit paiña mittikas paiña chihtikas sun aya kirakasa kuht kit kaizta:

—Sinam Izpul ka kiztui: “Hebreo awane Jerusalén pipulura aya kirapamikasha kuht kit Judío awachiruz chihkaanazi.”

¹²Sun miarawane, aukas Cesarea pipulura uztuzkas Pablora paikuamizta, Jerusalén pipulura chi imanpa. ¹³Pablone sinkanara:

—¿Chikishka azpuspas? Une nawa tayalnintu. Uspane nawa cadenakasa kuhshina. Nane kajchira inpain ish. Nane Anpat Jesús akwa Jerusalén pipulokin inapain ish.

¹⁴Pablo au kaizta aizpa mishimtuchi akwa, puñain paarinash. Anne ussa kaizmanash. Minpara “Dios pashit aizpa kitpa” kizaiznash.

¹⁵Sun kitpane, aune imizna watsaaiznash. Suas Jerusalén pipulura iaiznash. ¹⁶Minpazharuzne Cesarea pipuluras, Jesúsita piantuzne, aumiza Mnasónpa yaltakima pitna kanpaara. Usne an ñancha Chipre suras at kit ñamin Jesúsita piankamta.

Pablone Santiagora izna imtu

¹⁷Jerusalén pipulura pianatpane, Diosta piantuzne aumiza wat sappara. ¹⁸Tilawara Pablone aukasa iat kit Santiagora izaiznash. Suane wanmakmu ilaparuzne purara. ¹⁹Usparuza “kakishapu” kiznarawane, Pablone impara imparain usparuza paiña kal kirit aizpa kwinta kinara, Judío awachiruz Diosta piankamanapa. ²⁰Sun miarawane, uspane “Dios kwisha wari” kizara. Suasne Pablora kaizara:

—Au izmuruz, mirain. Mane kwisha akkwan mil Judío awakas Jesúsita nijkulara. Wanne nil chaamtu. Moisés kamtara aizpa mama kiarawa kizara. ²¹Uspane sunkana minñat kit kiznara. Nune Judío awaruza, mamaz sura uztuza, mamaz tuntu kamtanamiztu. Moisés kaizta aizpa kinchi kizamtu. Ampu pashparuza aya titnachi, circuncisión kinchi kizamtu. Judío awaka-

na uznachi kizamtu. Sunkana nu kamtanarit aizpa kizamtu. 22 ¿Aune chima kinpai? Nu arit piamkamtane, wan awane wan-makkanazi. 23 Aune nua kurunaiznash, au kaiztu aizpa kinpa. Apainne ampara ampune aukasa pura. Uspane Diosta chiwazha kin namat kit Moisés inintit aizpa kishiamtu, Dios iztakin sinam kulanapa. 24 Nukasa usparuza minari. Uspakasa it kit Dios iztakin sinam kulninti, Moisés inintitkana. Chiwazha uspa pui aizpa pariyara tari. Sun kitpane, uspane kizpu ash titninnashina. Sunkana kitne, wan Judío awane nu Moisés kamta aizpa kimtu piankamanazi. Suasne uspane uspa miara aizpa watchachi nijkulanazi. 25 Aune Judío awachiruzakas pinkih paramakpas. Aune sun Jesústa nijkulturuza kuruntamakpas, chiwazha ña dios awakana saritta milarit aizpa kuamanpa. Kalpa kuhtit aimpi puztakine, ña kuman. Aimpikas kuman. Ampuruzne mamazpa ashampara sanachi. Ashamparuzne mamazpa ampura sanachi.

Judío awane Dios katsa yalkin Pablora pizamtu

26 Suasne tilawara Pablone ampara ampura uskasa milnat kit Moisés inintit aizpa kit kit Dios iztakin sinam kulninnara, uspa kin namtit aizpa kianapa. Kwiztane usparuzne Dios katsa yalta nappat kit pariyara miza payu sun sinam kulnintu payura pailtu kainara. Sun payura ampara ampune chiwazha Dios ininta aizpa milanazi.

27 Siete payu pailnapain. Minpazha Judío awane, Asia suras awane, Pablora Dios katsa yalkin izara. Uspane Pablora pilchapuzat 28 kit kwianara: “Israel awa, kiwainchain. An ampune wan sura uztuza kamtanamtu cha. Usne au Israel awaruza aliz kulnarit. Usne Moisés kamtara aizpa mishitchi. Uskas Dios katsa yalta sinamchi namnintit. Mane Griego awara apain karara, Dios katsa yalta napnapa. Sun akwa, usne sun sinam yalkin sinamchi namninta.”

29 Uspane sun kizara, ñamin Pablora Éfeso pipulukin izara akwa. Sua Trófimone, sun Griego awane, Pablokasa chara. Pablo ussa, sun Griego awara, Dios katsa yalta mitit minñara. Griego awane sua napsachi.

30 Wan pipuluras awane aliz pilchapuzat kit ãnmin aara. Suasne Pablora pizat kit Dios katsa yaltas tain kinaara pianamalkima. Masain pijta sippara. 31 Wan Jerusalén pipulukin uztuz pilchapuzamtuasmin, suldaru ininmikane me Pablora pian-



Kutña suldaruruz Pablora milamtu

tashimtu mira. **32** Suasne usne paiña suldaru kiwaintuza wan-makninnat kit awa purakin ãñmin pianaara. Suldaru ininmikashakas suldaruruzakas izarawane, Judío awane Pablora an aim kiarachi. **33** Suasne suldaru ininmikane kasha at kit Pablora piz kit “ussa cadena kuhti” kiznara. Kwiztane “¿nune min mas?” mimara. “¿Nune chi kirit?” mimara. **34** Judío awane mamaz mazmin kwianara. Suldaru ininmikane chinkas misachiwal, pilchapuzamtu akwa. Usne Pablora suldaru kammu yalkin milnin-nara. **35** Suldaru kammu yal numkin piannatpane, suldarune Pablora kwat kit nuninta, aliz Judío awa ussa pizamanpa. **36** Wanne kwizta aat kit ka kwianara: “Usne irawa,” kizara.

Pablone wan awaruza us kit aizpa kainanamtu

37 Pablo Suldaru kammura naptuasmin, Pablone suldaru ininmumikasha kaizta:

—Chiwazha kizshinash, kizta.

Suldaru ininmikane sinkara:

—¿Nune Griego pit paramtukish? **38** Suasne ¿Nune Egipto awa chikish? ¿Nune akkwan payu ñamin waya kininat kit ampara mil waya kimtuzkasa pul sura milnamas?

39 Suasne Pablone ussa kaizta:

—Nane Judío awa ish. Cilicia suras at kit kwisha katsa wat Tarso pipulura kawira. Nua paikuntus, na awaruza kwinta kinana.

40 Suldaru ininmikane ussa kwinta kininta. Pablone kammu yal numkin kun kit chihtikasa awara puñain paninara. Puña parikane, Pablone awaruza Hebreo pit kwinta kinat kit ka kaiznara:

22 ¹“Israel awaruzkas an Israel awa papihshtuzkas nawa mizhain. Nane na kit aizpa kainanash.”

² Hebreo pit paraka miarawane, uspane an akkwan puñain paarit. Pablone usparuza ka kaiznara:

³ “Nane Judío awa ish. Cilicia sura Tarso pipulura kawiraish. Kwiztane Jerusalén pipulukin kawirau. Apane Gamalielne, Judío ilaparuz kamtamtu aizpa nawa kamtash. Nane pailta payu Dios Judío awaruza kaizta aizpa kishirau. Kawarain ma payu une sunkas kiashimtu. ⁴ Nane ñamin Jesústa piantuza piznarau, piantanakima. Ampuruzakas ashamparuzakas piznat kit kajchira sipnarau. ⁵ Pariya inintuzkas wan Judío ilapatuzkas nawa piankamara. Uspane nawa pinkih milaara, Damasco pipulura miłnapa, Cristora piantuza piznanapa, au Judío ininmuruza chihkanapa. Nane sua it kit Jesústa piantuza sairau. Jerusalén pipulukin karanarau, usparuza ilnana.”

Pablone miza Jesústa piankamtit kainanamtu

(Hch 9.1-19; 26.12-18)

⁶ “Na miwara imtuasmin, Damasco pipulura piananpain arau. Sua paizka payu paka masain chiwazhane chiyuras pankanain kwisha malta. Sun iztawane, ⁷ pilta naintirau. Suas min-



Pablo pilta taizta

pazha pit kaizka mirau: ‘Saulo, Saulo. ¿Chikishma nune nawa kwail kimtus?’ kizta. **8** Suasne ussa mīmarau: ‘Anpat. ¿Nune mīnmas?’ kiztau. Nawa sinkaish: ‘Nane Jesús Nazaret pipuluras ish. Nuin nawa kwail kimtu,’ kizta. **9** Nakasa imturuzne sun pan-kanain izat kit ishkuara. Uspane an pit nawa kwinta kit aizpa mīarachi. **10** Suasne kaiztau: ‘Ap Anpat, ¿Chima kinpai?’ Anpat- ne nawa kaizish: ‘Kuh sak kit Damasco pipulura imizti. Tane nu wan kishimtu aizpa kiznash.’ **11** Sun pankana nawa aiztu akwa, nane izsachi parish. Katmizna ap kanpamtuzne nawa sailta tainñara, Damasco pipulura piannankima.

12 Tane maza ampune, Ananías muntitmikane, uzta. Usne Moisés kaizta aizpa wat kira. Wan Judío awa Damasco pipulura uztuzne us akwa kwisha wat kwinta kiara. **13** Ananíasne nawa izna ara. Piannatpane, kaizish: ‘Saulo, ap izmumika, mamasa up kasu izkulti.’ Masain wan izkulkwerau. **14** Suasne nawa kaizish: ‘Au kwalpa Diosne ñamin nua narit, us kishimtu aizpa pian- kamnapa. Usne nua narit, nilmikasha izna, paiña pitmin mina. **15** Mane nune awaruza nu Jesús pa piankamta aizpakas izta aiz- pakas nu mira aizpakas kainammiztawa. **16** Mane an tirizman. Kuh sak kit munti. Jesús ta paikwari, up kwail kirit aizpa kwiz- ninnapa.’”

Diosne Pablora Judío awachiruz a ininnamtu

17 “Jerusalén pipulura kailtawane, nane Dios katsa yalta nap kit Diosta paikwarau. Suane kainkizpamtuasmin, chiwazha iz- tau. **18** Nane Anpatta iztau. Usne nawa ka kaizish: ‘Jerusalén pi- puluras puz kit iri. Uspane nu nawa kaizta aizpa mīamanazi.’ **19** Suasne nane ussa kaiztau: ‘Anpat. Uspane na wan Judío kam- mu yalta irit pian. Nane nua nijkulturuza piznat kit kajchira sip- narau. Nane usparuza aim kinarau. Uspane sun pian. **20** Este- banne up kiwainmika ara. Usne awaruza nuwa kainanara. Ussa piantamtuasmin, nane sua kun kit ussa piantara aizpa nijish. Nakas piantamturuzpa pīn iztau.’ **21** Suasne Anpatne kaizish: ‘It. Nane attishta Judío awachiruz a ininnamtus.’”

Pablokas Roma suldaru ininmikakas

22 Judío awachira imtus kizka mīarawane, wanne kwiana- mizta: “Ussa piantarawa, an sukin uzmanpa,” kizara. **23** Uspane kwianamizta kwisha. Aliz akwa, uspa pīn ulpianat kit pul pil

kwash sunakninñara. **24** Suldaru ininmumikane suldaruruza ininara, Pablora suldaru kammu yalta milnapa. Usne ussa ilninishira, paranpa. Usne chikishma awa sunkana Pablora aliz kwianamtui kiz piankamshira. **25** Ussa titkasa kuhtawane, ussa ilnainpaina mara. Pablone katsa suldaru ininmikasha mimara:

—¿Romano pipuluras awara iltukish? Nune nawa ilsachi, na Roma suras ara akwa. Mama nune nawa katsa mikwara milmas. Katsa mikwane nawa kwail kirit kiztachi.

26 Sun mirawane, suldaru ininmumikane it kit katsa suldaru ininmikasha sunpa parat kit kaizta:

—Kuiraruin. An ampune Romano pipuluras awa i.

27 Katsa suldaru ininmikane Pablo tukin pianat kit mimara:

—Kaizcha. ¿Watcha nune Romano awakish?

Pablone sinkara:

—Watcha i.

28 Suasne katsa suldaru ininmikane ussa kaizta:

—Nane akkwan pial tarau, Romano awa namnapa.

Pablone ussa kaizta:

—Nane Romano awa ish, kawira akwa.

29 Sun miarawane, Pablora ilshimturuzkas katsa suldaru ininmikakas Pabloras paimpa iara. Pablo Romano awa ara nijkulakane, uspane ishkuara, ussa pizara akwa, ussa cadena kuhara akwa.

Pablone Judío katsa mikwakasa kwinta kimtu

30 Tilawara katsa suldaru ininmumikane Pablora piankamshira. Chikishma Judío awa Pablora kwail kirit kizamtu aizpa piankamshira. Pablora cadena chihtawane, usne pariya inintuzakas Judío katsa mikwaruzakas wanmakinñara. Suasne Pablora akwanat kit uspa purakin kunninta.

23 ¹ Pablone Judío katsa mikwaruza iznat kit kaiznara:
—Ap aimpihstuz, mizhain. Nane makima Dios iztakin wat min kit wat uztai.

2 Suasne Ananíasne, pariyawa ininmumikane, Pablo kashara uztuza ininnara, Pablora pitkin kuzanapa. **3** Pablone sinkara:

—Diosne nua sunkanain kuznazi. Nune kwail awa i. Suain uztuasmin, nune Moisés para akwa nawa kwail kirit kiztu. ¿Chikishma nawa kuznapa ininnamtus? Nuin Moisés kaizta aizpa mimituchi.

4 Sua puraruzne ussa kaizara:

—Nune Diospa katsa pariyara kwail kizmun.

5 Pablone kaiznara:

—Aimpihstuz. Nane an katsa pariya ininmumikasha pianchiarau. Dios pinkihta ka parit: “Uspawa ininmumikasha kwail kizman.”ⁱ

6 Suasne minpazha Saduceo awakas Fariseo awakas wanmakkarit. Sun nijkultawane, Pablone katsa mikwa wanmakturuza ka tinta kaiznara:

—Ap aimpihstuz, mirain. Nane Fariseo awa ish. Ap kwalakas Fariseo awa mai. Uspane nawa kwail kirit kizamtu, na awa irittas mamasa kakultu kamtamtu akwa. Watcha, Dios irittuza mamasa kakulninnanazi nijkultus.

7 Sun miarawane, Fariseo awakas Saduceo awakas usparuzpain tinta kwinta kiamiz kit paimpa paimpa wanmakkara. 8 Saduceoruzne awa irittas kakultuchi kizamtu. Ángelkas wachi; izpulkas wachi, kizamtu. Fariseoruzne sun wanta nijkulamtu. 9 Wan tinta kwianamizkane, minpazha Fariseo awane, Moisés kaizara aizpa kamtamtuzne, kaiznara:

—An ampune chinkas kwail kitchi. Ussa mishipuspas. Sunkana maza izpul, maza ángel ussa kwinta kitka.

10 Tinta pilchapuzamtu akwa, Suldarura ininmumikane Pablo akwa ishkwara, awa ussa piantashiamtu akwa. Suasne suldaruruza ininara, Pablora usparuztas ukkanapa. Mamasa suldaruwa kammu yalkin milta.

11 Tilawa amtane Anpatne Pablora izpan kit kaizta: “Pablo. Tinta kulti. Nune na akwa akki Jerusalén pipulukin kwinta kira. Sunkanain Roma pipulura na akwa kwinta kitpa.”

Minpazha Pablora piantashimtu

12 Tilawara minpazha Judío awane wanmakkat kit nijkulara, Pablora piantana. Uspane ka kin namara: “Aune chinkas kuaizamanapas, ussa piantanakima.” 13 Cincuenta panapain Judío ampuruzne sunkana kin namara. 14 Uspane pariya inintuzparakas Judío ilapa inintuzparakas iat kit kaiznara:

—Aune chinkas kwanchi kin namtamakpas, Pablora piantanakima. 15 Mane ukas mamaz Judíowa mikwaruzkas suldarura

ⁱ 23.5 Éx 22.28

inimmikwara paikwarain, tilawara u purakin Pablora karanpa. Ussa ka kaizti: “Aune ussa an nil mimapuspas.” Apa atchasmin, aune tirizaiznapas, ussa piantana.

16 Pablowa sobrinone sun piankam kit suldaru kammukin sunpa Pablora kainana ira. 17 Sun mirawane, Pablone suldaru ininmumikasha akwat kit ussa kaizta:

—An musittu suldarura ininmumikasha milti. Usne ussa chiwazha kizna mija.

18 Suldaru ininmumikane katsa suldarura ininmumikasha ussa mil kit kaizta:

—Pablone, siptitmikane, nawa akwat kit paikwara, sun pashpara akkikima karanpa. Usne nua chiwazha kizna mija.

19 Katsa suldarura ininmumikane sun pashpara chihtikin piz kit mil kit paimpa mimara:

—¿Chima kizshiras nawa?

20 Suasne pashpane kaizta:

—Judío awaruzne nijkulari, tilawara nua paikwan, Judío ininmumika wanmaktukin Pablora milnapa. Uspane kaizanazi: “Aune Pablowa an nil mimashipuspas.” 21 Usparuza mimun. Cincuenta panapain Judío ampuruzne kularit tirizamtu. Uspane chinkas kuamtuchimakpas kin namara, Pablora piantanakima. Mane uspane up sinkamtu aizpa tirizat kit Pablora piantanapain.

22 Suasne Suldarura ininmumikane pashpara iri kiz kit minainkas us kwinta kit aizpa kainanachi, kizta.

Suldarura ininmumikane Pablora Félixakima inintu

23 Suasne katsa suldaru ininmumikane paas ainki suldaru ininmumikasha akwanara, akkwan suldarura wanmakninnanapa. Paas cien suldaru mittiwarain iamtu wianta. Setenta suldaru caballowara anuzamtu wianta. Paas cien suldaru ti kwizkasa chaamtu wianta. Wan wanmakkarawane, uspane Cesarea pipulura tilpaka, nueve urara ianapain. 24 Ussa an innnara, caballo watsanapa, Pablo anuznapa. Ussa milti, katsa mikwa Félixakima, watmin piananapa. 25-26 Uspakasa sun pinkih pat kit ininta:

Nane Claudio Lisias mun ish. Nane “kakishapu” kiztus.

Nune, Félix muntitmikane, au kwisha wat katsa mikwa i.

An pinkih nua inintus.

27 Judío awane an ampura pizat kit piantanapain. Us Romano awa i piankamtawane, nane ap suldarukasa it kit usparuztas nakanarau. 28 Nane chikishma kwail kizamtui kiz piankamshirau. Katmizna nane ussa Judío katsa inintuz wanmakkarit purakin miltau. 29 Uspa inim akwa, uspane ussa kwail kirit kizamtu. Ussa piantana nilchi. Kajchirakas sipna nilchi. 30 Judío awa ussa piantashimtu piankamtawane, nane nu tukin ussa azain inintau. Ussa kwail kirit kizmuruz kurunnarau, nu iztakin ianapa. Suane uspane us kwail kirit aizpa nua kizashina. Anne kaiztuchish.

31 Suasne katsa suldarura ininmumika inintu aizpa miarawane, wan suldarune Pablora pizat kit amtawara ussa Antípatris pipulurakima milara. 32 Tilawara suldaru mittiwara imtuzne suldaru kammu yalkin kaiyara. Caballokasa imtuzne Pablokasa iamizta. 33 Cesarea pipulura piannaarawane, uspane katsa mi-kwara pinkih chihkara. Pablorakas sua tiwij iara. 34 Pinkih iztawane, katsa mikwane Pablora mimara: “¿Nune mintas mas?” Cilicia suras arit piankamtawane, 35 ussa kaizta: “Nu kwail kirit kizmuruz aakane, nua minash.” Suasne suldarura ininta, ussa izanapa, Herodespa inintu yalta.

Judío awane Pablo kwail kirit kizamtu

24 ¹ Cinco payu paitawane, Ananíasne, katsa pariyawa ininmikane, Cesarea pipulura pianara Judío ilapa inintuzkasa. Tértulone, awaruzo pakpanammikane, pianara. Uspane katsa mikwa iztakin kwinta kiara, Pablora kwail kirit kizna. ² Pablora karaarawane, usne Tértulora paranpa akwara. Suasne Tértulone us kwail kirit kizmuz kit Félixta kaizta:

—Anpat. Nawa mizha. Nune au katsa mikwa i. Nu kwisha wat min kit nil inintu akwa, aune akkwan payukima kalpain uzpuspas. Ukas au su uzturuzo kiwainamtu. ³ Aune nu chiwazha au akwa kira aizpa aishtaish kizpuspas. ⁴ Nane nua kwisha kaizapmanash. Katmizna nua paikumtus, aumiza pitchin minapa. ⁵ Aune sun ampura wanmaltitmakpas. Usne katsa ki piztitkain iztit, awara kaizaptu akwa. Uskas wan sura Judío awara paimpa paimpa wanmakinnamtu. Uskas Nasareno awawa ininmika i. ⁶ Us Diospa katsa yalta sinamchi sanintu, Griego awa sua napnintit akwa. Sun impa. Katmizna aune ussa piztamakpas. Au mikwa kaizta akwa, aune ussa ilshiaiznash. ⁷ Suas-

ne Lisiasne, katsa Suldaru ininmikane, akkwan suldarukasa aat kit ussa auruztas tinta ukkarit. **8** Suasne Lisiasne aumiza ininna-ra, up iztukin ianapa, Pablo kwail kirit kizna. Nuin ussa mima-shina. Suasne nune au kaizara aizpa watcha i piankamnazi.

9 Judío awa wanmakmuruzne kawarain watcha i kizara.

Pablone Félix iztakin paramtu

10 Suasne katsa Félix mikwane chihtikasa Pablora anta, par-panpa. Pablone ka kaizta: “Nane nu au sura akkwan añokima inintit pianish. Katmizna nane na kit aizpa nua parashimtus, piankamnapa. **11** Paas domingoin Jerusalén pipulukin piannarau, Diosta wakpuj wain kit Diosta paikwan. Kawarain nune sun mimashinai. **12** Uspane minkasainkas tinta kwinta kimtu nawa wanmalarachi. Dios katsa yalkinkas Judío kammu yalkinkas mamaz pipulukinkas minainkas kaizaptu nawa wanmalarachi. **13** Na kwail kirit kizarakas, an awaruzne chinkas annasachi. **14** Nane nua watcha kaiztus. Nane Anpatpa masas miwara imtus. Sun miwarain nakas au irit kwalkana sun Diostain wakpuj waintus. Uspane ‘sun mine kwail i’ kizamtu. Nane Moisés pin-kih para aizpakas Dios pit kainammtuz kaizara aizpakas nijkul-tus. **15** Nakas uspakas kawarain Diosta tirizpuspas, us kaizta aizpa kin. Diosne irittuzakas kwailtuzakas wattuzakas kakulninnazi. Sun tirizpuspas. **16** Katmizna nane pailta payu wat min kit Dios iztakinkas awa iztakinkas nil uzshimtus.

17 Akkwan añochikimain mamaz sura chatpane, nane ap su-marain kailtau, Judío awara pial milan, wakara piantaritkas Diosta milan. **18** Na sun kimtuasmin, minpazha Judío awaruzne Asia suras aat kit Dios katsa yalta nawa wanmalash. Na Moisés inintit aizpa kitpane, Dios iztakin nawa sinam sanintawane, uspane sua nawa izara. Akkwan awa purachi. Minminkas pilchapuzarachi. **19** Minpazha atchiruzne na kwail kirit aizpa kizashira. Uspain aarawa, up iztakin na kwail kirit kizana. **20** Uspa na kwail kirit kizashitkine, katne akki puraruzne na kwail kit aizpa kiztain. Na Judío katsa mikwaruz iztakin kuntuasmin, ¿Chima kwail kizzi nane? **21** Uspa iztakin kuntuasmin, nane tinta ka kaiznarau: ‘Mane uspane na kwail kirit kizamtu, na Dios irittuza kakulninnamtu kiztit akwa.’”

22 Félixne Anpatpa masas miwara wat pian. Usne Pablora kwail kirit kizshitchi. Katne usparuza kaiznara:

—Lisias, katsa suldarura ininmumika, akane, nane na kishimtu aizpa uruza kaiznanash.

23 Suasne Félixne suldaru ininmumikasha ininta, Pablora iznapa. Ussa sipnintachi. Pablowa izmuruzne ussa izashina, ussa kiwainapa.

Pablone Félixkasa Drusilakasa kwinta kimtu

24 Akkwan payuchin Félixkas Drusilakas, paiña Judío ashampakas, mamasa piannail kit Pablora akwanpa ininta, Pablo usparuza Jesúska kamtanapa. Uspane Jesucristowa piankamshiilta, ussa nijkulna. **25** Pablone usparuza ka kaiznara:

—Wat uztain. Kwail kishitne, kiman. Mamaz payura Diosne anazi, kwail kimtuza ilnana.

Pablo sun kizkane, Félixne ishkwat kit kaizta:

—Imizti mane. Mamaz an wat payune mamasa nua akwanash.

26 Félixne Pablora akkwan piji akwara, uskasa kwinta kinpa. Usne Pablo pial tanapa tirizta, ussa chihtna. **27** Paas años sunkanain pailtawane, Félixne Pablora chihitshitchi, Judío awaruz pashit aizpa kishimtu akwa. Suasne Félixne an katsa mikwakana puzta. Kwiztane Porcio Festone katsa mikwa namta, Félix inimkin.

Pablone Festokasa kwinta kimtu

25 ¹ Suasne Festone at kit katsa mikwa namta. Kutña payu pailtawane, Cesarea suras Jerusalén pipulura nura. ² Suane pariya inintuzkas anza katsa Judío awaruzkas Festora iara, Pablo kwail kirit aizpa kizna. ³ Uspane ussa paikuara, Pablora Jerusalén pipulura milnapa. Uspane ussa miwarain pian-tana minñara. ⁴ Festone Pablo kajchira wa Cesarea pipulura sin-kara. Us sua ishimtu akwa, ⁵ Festone kaiznara: “U ininturuzne nakasa Cesarea pipulura iarawa. An ampu kwail kiritne, une sua us chiwazha kwail kirit aizpa kizashina.”

⁶ Jerusalén pipulura an diez payukimain marawane, Festone Cesarea pipulura kihshita. Tilawara paiña inim uzmura uz kit suldarura ininta, Pablora karanpa. ⁷ Pablo naptawane, Jerusaléntas Judío awaruzne ussa kashara aat kit kwisha akkwan kwail kirit ussa kizamizta. Pablora akkwan kwail kirit kaizaritkas, uspane paiña kwail annasachi. ⁸ Suasne Pabloin us akwa pakpara:

—Nane chinkas kwail kitchish. Judío awawa ininta aizpara kwail kitchish. Dios katsa yaltakas kwail kitchish. Romano katsa mikwarakas kwail kitchish.

9 Festo Judío awara wat kinashimtu akwa, Pablora mimara:

—¿Jerusalén pipulura ishimtukish? Suane nane nu kwail kirit aizpa izninnash.

10 Pablone sinkara:

—Nane Romano katsa mikwa uzmuKin tus. Apane nune nawa kwail kirit aizpa kiztawa. Nune Judío awaruza kwail kitchish wat pian. **11** Na Moisés kaizta aizpa kitchine, irawash. Na kwail kiritne, nune nawa iltawa, inapa. Na uspa kaizara aizpa kitchine, minminka nawa Judío awaruza chihkasachi. Nane nua paikumtus, nawa katsa mikwa Cesarta, Roma pipulura inintumikasha, ininnapa, nawa iznapa.

12 Suasne paiña kurunmuruzkasa kwinta kitpane, Festone kaizta:


—Nune paikwara, katsa mikwara in. Katmizna katsa mikwara inazi, kizta.

Pablone Agripa ininmikasha kwinta kimtu

13 Akkwan payuchin pailtawane, Agripa katsa mikwakas paiña ashampa Berenicekas Cesarea pipulura iilta, Festora “kakashapu” kizna. **14** Akkwan payuchin sua mantazasmin, Festone ininmumikasha Pablowa kwinta kit kit kaizta:

—Akkine maza ampune tu. Félixne ussa siptattit. **15** Na Jerusalén pipulura tuasmin, pariya inintuzkas ilapa Judío inintuzkas nawa aat kit Pablo kwail kirit kizamizta. Uspane nawa Pablora iyanapa paikuara. **16** Nane Romano inintuz kaizara aizpa kiz kit ka sinkanarau:

—Au Roma awaruzne minainkas piantamtuchi. An ñancha us kwail kirit kaizmuruzne wanmakkara, paiña iztakin paiña kwail kirit aizpa kizanapa. Awa us kwail kimtus kizamtukas, usmin pakpashina. **17** Suasne uspane nakasa apa aara. Tiriztachin, tilawara nane ap inintukin uz kit Pablora kanapa ininnarau. **18** Us kwail kirit kaizmuruz akane, uspane ussa chinkas kwail kirit kizmanamara. Usne na mintu aizpa kitchi. **19** Uspakas Pablokas nijkularachi, miza Diosta wakpuj wainna, Diosta paikwan. Pablone kaiztu: “Jesúsne, iritmikane, uzi,” kiztu. **20** Uspa pilchapuzamtu akwa, nane we piankam kit chi kin pianchiarau.



Pablo Agripa tukin, Félix tukin kuntu

Katmizna nane Pablora ka minmarau: “¿Jerusalén pipulura ishimtukish? Tane uspane nu kwail kirit kizshianazi.” ²¹ Mane usne nawa paikwara, katsa mikwara inninnapa, awa ussa kwail kirit aizpa kizanapa. Nane ussa kajchira sipnintau, na Augusto katsa mikwara inninakima.

²² Agripane Festora kaizta:

—Nakas an ampura mishimtus.

Festone sinkara:

—Tilawain ussa minazi.

²³ Tilawara Agripakas Berenicekas watsal pñn kwaat kit pianail kit awa wanmakmukin nappailta. Katsa suldaru inintuzkas pipulura inintuzkas purara. Awane sua kih ulpianara. Suasne Festone Pablora kanapa inintawane, ²⁴ kaiznara:

—Mirain. Au katsa mikwa Agripakas wan awa aukasa wanmakturuzkas mirain. Une an ampura, au akki mijmikasha izamtu. Us akwa kwisha akkwan Judío awaruzne Jerusalén pipuluraskas an pipuluraskas aat kit kwianta, nawa an ampu irawa kizanapa. ²⁵ Nane paiña kwail kirit aizpa wat pianchish, ussa piantana. Mane usmin nawa paikwara, katsa mikwara, Cesarta, inninnapa, us kwail kirit aizpa kiznapa. Nane ussa katsa mikwara ininshimtus. ²⁶ Makima nane Pablora chinkas mijchish, ap anpatta katsa mikwara pana. Katmizna nane ussa nu iztakin kararau. Nane nua, au mikwa Agripawain iztakin, kararau, ussa

mimanapa. Suasne nane chiwazha mij aizpa Cesarta pinkih panash. ²⁷Nane nil chi mintus, kajchira siptitmikasha ininnapa, us kwail kirit kiztachine.

Pablone usmin Agripakin pakpamtu

26 ¹Suasne Agripane Pablora kaizta:
—Nuin nu kit aizpa pakpashinai.

Pablone chihti anak kit ka paramizta: ²“Au ininmika Agripa, mizha. Nane watsal kultus, nu iztakin tuan, na kit aizpa kaizna. Judío awane na kirit aizpa watcha kizamtuchi. ³Nune miza au Judío awa uzamtu an wat pian. Judío awa nijkulamtu aizpa wat pian. Katmizna nua paikumtus, nawa wat minapa.”

Jesústa piantarachasmin, Pablone mamaz tuntu uzta

⁴“Wan Judío awane nawa ainki asmin pian. Nane uspakasa Jerusalén pipulurakas ap surakas uztau. ⁵Na musittuasmin, nane Judío Fariseo awa kamtatitkanain uztau. Uspane na nil uzta wat pian. Uspane na miza uzta nua kaizashina. ⁶Diosne Judío awaruza sun kin namnara, irittuza kakulninnana. Na sunpa nij-kultu akwa, uspane nawa karaarai, nawa kwail kirit kizanapa. Nakas au kwalkana Diosta tiriztus, us kin namta aizpa kinkima. ⁷Au doce Judío kwaltuzne Dios sun kin namta aizpa tirizamtu, sun kinkima. Katmizna uspane pailta payu Diosta wakpuj wainñamtu. Katsa mikwa Agripane, mizha. Na Dios sun kinpa tiriztu akwa, an Judío awane nawa kwail kirit kizamiztu. ⁸U Judío awa, mizhain. ¿Chikishma Dios awara irittas kakulnintu nijkulamtuchi?”

Ñamin Pablone Jesústa piantuza piznara

⁹“Ñamin nakas Jesústa aliz kulna mintu arau. Usne Nazaret pipuluras ara. ¹⁰Sunkana Jerusalén pipulukin kirau. Judío pariyaruzne pinkih paat kit nawa sun pinkih chihkat kit nawa ininñara, uspa kiashimtu aizpa kin. Nane kwisha akkwan Jesústa nijkulturuza kajchira sipnarau. Awa usparuza piantanamtuasmin, nakas nijkultu arau. ¹¹Nane akkwan piji usparuza ilnarau, ‘Jesústa pianchish’ kaizanapa. Kawarain wan Judío kammu yaltakima sun kirau. Na usparuza kwisha pilchapuznara akwa, nane mamaz surakima usparuza piznashirau.”

Pablone mamasa Jesústa nijkultus kiztu

(Hch 9.1-19; 22.6-16)

12 “Katmizna sun kishimtu akwa, nane Damasco pipulura imiztau. Pariya inintuzne nawa pinkihkasa ininñara, uspa paraara aizpa kin. 13 Ininmumika miri. Miwara imtuasmin, nane paizka payura impil chiyuras iztau. Impilne pa kinka anza kai nawakas ap izmuruzakas malta. 14 Suasne aune pilita nainaiznash. Suas nane mazara kwinta kika mirau. Usne Hebreo pit paraka nawa kaizta: ‘Saulo, Saulo. ¿Chikishma nawa kwail kimtus? Nawa mirakine, nune nuin kwail kimtu. Nune wakara ampukana i. Pamika wakarara ti kwizkasa papa kimtukana, usne mitti tinta kulmu. Nukas aliz kultu, na nua kuruntu aizpa mishimtuchi akwa.’ 15 Suasne nane mimarau: ‘Anpat, ¿Nune minmas?’ Anpatne nawa kaizzi ish: ‘Nane Jesús ish. Nune nawain kwail kimtu. 16 Mane kuhsak kit kunti. Nane nua narit, nawa kiwainapa, nu izta aizpa kainanapa. Nane nua izpantau, an imparara nu iztu aizpa awaruza kainanapa. 17 Nane nua Judío awaraskas mamaz awaraskas paimpa chihtnash, uspa nua kwail kiamanapa. 18 Mane nane nua inintus, Judío awachiruz watcha piankamanapa. Nune tilkwilta chamturuza, Satanás miwara imturuza, kurunnarawa, kaira chaanapa, Dios miwara chaanapa. Suasne Diablone usparuza ininmanazi, uspa Diosta kaiyara akwa. Nawa nijkulamtu akwa, nane uspa kwail kiarit aizpa wat kulnanash. Nakas Dios narittuza chiwazha chiyura milanash, Dioskasa uzna.’”

Pablone Anpat kaizta aizpa kimtu

19 “Au Agripa mikwa, mizha. Chiwazha chiyuras izpankane, nane Jesús kaizta aizpa mit kit kirau. 20 An ñancha nane Damasco pipulura uztuza Dios pit kainanarau. Suasne Jerusalén pipulura uztuzakas, wan Judea sura uztuzakas, Judío awachiruzakas Dios pit kainanarau. Nane usparuza akwanarau, uspa kwail kiarit maizanapa, Diosta kaiyanapa. Uspane wat kal kiarawa. Mamaz tuntu uzarane, awane uspa maizarit awakana uzamtu kizanazi. 21 Sun akwa, Judío awaruzne nawa Dios katsa yalkin pizat kit nawa piantashiamtu. 22 Dios nawa makima kiwaintu akwa, nane kun kit wan awaruza chiwal na pian aizpa kainanamtus. Nane Dios pit kainammtuz kaizta aizpakas Moisés kaizta aizpakas sunmin kaiztau. Nane uspa kaizara aizpa kawarain

mamasa ka kaiztus: **23** ‘Dios naritmikane ishina. Irawane, Diosne ussa irittas an ñancha kuhsnazi. Katmizna Diosne Judío awaruzakas mamaz awaruzakas wat kakulninshina, usparuza wat-sat milnanapa. Jesús uztu akwa, Diosne Jesústa nijkulturuza uz-ninnanazi.’”

Pablone Agripa kaizta: Jesústa piankamtawa

24 Pablo us akwa sun pakpakane, Festone ka kwianta:

—Pablo. Nune nukku parit. Akkwan pinkih iz kit nukku parit, kizta.

25 Pablone Festora sinkara:

—Au wat mikwa, nane nukku chi ish. Sunkana na kaiztu aizpa watcha i. Nil i. **26** Apane katsa mikwane, Agripa tui. Usne na kaiztu aizpa wat pian. Katmizna nane us iztakin watsal paramtus, ishkwatchin. Uskas wan kiarit aizpa wat pian. Wan awane chiwazha kiarit aizpa pian. Chinkas kulamtuchi. **27** Katsa mikwa, Agripa, ¿Dios kaizmuruz parit aizpa mĩmtukish? Watcha, nune uspa parit aizpa mĩmtu.

28 Agripa Pablora kaizta:

—Pitchin pit paramtuasmin, nune nawa Jesústa pianmikakana namninshina.

29 Suasne Pablone sinkara:

—Watcha, nane pitchin pit pararau. An akkwan pit nua parashimtus. Nane Diosta paikumtus, nuakas wan awaruzakas, nawa mĩmtuzakas Jesústa piankamanapa. Une nakana Jesústa piankamtakanain namashina, cadenakasa kuhtachin.

30 Pablo sun kiztawane, katsa mikwakas, ininmumikakas, Berenicekas, wan sua uztuzkas, kunat kit **31** paimpa sun kirit aizpa kwinta kin iara. Usparuzpain kaizara:

—An ampune chinkas kitchi. Kajchira wasachi. Ussa piantasachi.

32 Agripa Festora kaizta:

—Mane an ampu au Cesarta, katsa mikwara, in paikwarit akwa, aune ussa chihtsachimakpas.

Uspane Pablora Roma pipulura ininamtu

27 ¹Minpa uspane aumiza Italia sura ininnashiara. Festone Pablora mamaz siptittuzakas Julio muntitmikasha chihkanara, usparuza iznanapa. Julione Augusto suldaru mun-

tuza ininnara. 2 Suasne aune katsa kanuara waaiznash. An kanua pimamin Adramitio pipuluras arit. An kanua Asia suwara pimawarain inpain. Aristarcokas aukasa tuazi. Usne Macedonia suras Tesalónica pipuluras arit. 3 Tilawara Sidón pipulura pian-
aiznash. Suane Julione Pablora wat kira, izmuruzpara izna in-
pa, Pablora kiwainapa. 4 Sidón pipuluras puzarawane, tinta in-
kwa pamtu akwa, aune Chipre su pi paizkakin mamarain pin-
aiznash, inkwa aumiza nuppainmanpa. 5 Katsa piwara iamtuas-
min, aune Cilicia su makiminkas Panfilia su makiminkas pinaiz-
nash. Mira pipulura Licia sura pianarawane, aune kanuaras kih-
shaiznash.

6 Suane suldarura ininmumikane, Julione, Alejandría pipu-
luras kanuara wanmalta. An kanua Italia sura imtu akwa, au-
miza kanuara waaninpailnash. 7 Tinta inkwa pamtu akwa, ak-
kwan payukima impara impara iaiznash, kasha Gnido pipulu
makin piannankima. Tinta inkwa pamtu akwa, Salmona su ma-
kin pin kit Creta su pi paizkakin pilzaaiznash. 8 Puijna kal akwa,
Creta su pimawarain imparain iaiznash, kanua piannamkin
piannankima. Sun piannamkin Buenos Puertos muntit. Lasea
pipulu kashain uz.

9 Impara iamtu akwa, akkwan payu parit. (Sua tiriztuasmin,
Pascua pishta taizta.) Katsa alu kishimtu akwa, inkwa tinta pa-
shimtu akwa, piwara iashichi. Kanua paltainshina. Katmizna
Pablone kurunnara:

10—Izmuruz, nawa mirain. U kanuawara iamiztune, ak-
kwan kwail aumiza kirinazi. U kanuakas kanuara kwa aizpakas
kashina. Aukas ishinamakpas.

11 Suldaru ininmumikane, Julione, Pablora mirachi. Usne
kanuawamika kuruntu aizpa mira. Kanua puijmuruz kuruntu
aizpa mira. 12 Alu kimtu akwa, inkwa pamtu akwa, uspane an
kanua piannamkin akkwan payu nukkulashitchi. Kwinta kim-
tuasmin, an akkwanne tas puzna minñara. Fenice kanua pian-
namkin Creta su pi paizkakin ishiara, ta piannashina. Uspane
alu palnakima inkwa pailnakima sua mashiara. An kanua pian-
namkis mazane pamals puzshina. Pa payapmura kaiwarain azi.

Pira inkwa tinta pamtu

13 Suasne África suras inkwa impara pamizkane, uspane in
minñara. Pi ayuktas uk tainak kit kasha Creta suwara iamizta.

14 Sun urain an tinta inkwa Creta suras pamiz kit kanuara nupainta. Pa puzmumals pamtu. 15 Tinta inkwa pamiz kit kanuara paltainmizkane, aune kanuara inkwa akwa puijsachimakpas. Au kanuara puijsachi akwa, inkwane nuppain kit aumiza milta. 16 Aune Cauda su pi paizkakin, inkwa tintachi pamtukin, pinainzash. Akkwan kal kitpane, aune ainki kanuara tain kit katsa kanuara watsaaiznash. 17 Ainki kanua katsa kanuara isal nuarawane, katsa kanuara titkasa sam kuhara. Suasne Sirte ksuwara pul piwara iamtuasmin, uspane ishkuarit, inkwa nupamtu akwa. Uspane pīnkas taizninñara, an azain imanpa. Suasne inkwain aumiza nuppainta. 18 Tilawara inkwa tinta pamiztuasmin, uspane uspa chiwazha kanuara wintit aizpa kanuaras pira kiakpinamizta. 19 Kutña payura uspane uspa chihtikasain pīnkas wan tikas titkas kiakpinara. 20 Akkwan payukima aune pakas kimakas izamanash. Inkwa kwisha tinta pamiztuasmin, kanua paltainmizta. Minpara aune auruzpain watcha inapain minainzash.



Pablo katsa kanuakin tu, inkwa nupaintuasmin

21 Au kwisha akkwan payukima kuarachi akwa, Pablone uspa paizkakin kun kit kaiznara:

—Izmuruz mirain. Na kaiznara aizpa wat miana watmare. Creta suras puzmanpa watmare. Mane aune naizpuspas. Une wan mij aizpa kaarit. 22 U sun kiaritkas, wat min kit tinta kultain. Minminkas iamanazi. Kanuarain azpian kit karinazi. 23 Nane Diospa kiwainmika ish. Ma amta usne paiña ángelta nawa ininta. Nawa izpamtuasmin, 24 ángelne nawa kaizzi ish: “Pablo. Ishkumun. Nune katsa Romano mikwara, Cesarta, itpa. Diosne nu akwa wan kanuara waruza kiwainanazi, iamanpa.” 25 Katmizna, ap izmuruz, ish-kuman. Nane Diosta nijkultus. Paiña ángel nawa kaizta aizpa watcha i pianish. 26 Inkwane aumiza mamaz su pi paizkara nuppainnanapas.

27 Paas domingo pintawane, inkwane kanuara nuppainmizta Adriático piwara. Kakwamtane kanua kiwaintuzne nijkulara, pilta piannanpain. 28 Uk titkasa pi ayuktakima kiain izara, yawa ainkihkas anizna. Viente sa anizara. An kwiztane mamasa anizara. Quince sa anizara. 29 Katsa ukta patkirin akwa, ishkuat kit ampara kwisha katsa uk kuh kit kanua pilmal kiainñara, an azain chi imanpa. Ishkuat kit tirizara, kinnakima. 30 Kanua kiwaintuz kanuaras iashimtu akwa, uspane katsa kanua pitkis ainki kanua pira inkihshamizta. Uk tit kuhtit kiaintukanain kiara. 31 Pablone Juliorakas, suldaru ininmikashakas, suldaruruza-kas kainanat kit kaiznara:

—Uspa katsa kanuara maarakine, une pilta pianasachi.

32 Suasne Suldaruruzne ainki kanuawa tit tittat kit kanua pira taizninñara.

33 Tilawain kinmizkane, Pablone wanta kurunara, chiwazha kuaiznapa. Usparuza kaiznara:

—Me paas domingo une tirizamtu, pittarachikas, kuaarachikas. 34 Nane uruza paikumtus, chiwazha kuaiznapa. Une kuarawa, najamanpa. Minminkas iamanazi. Chinkas naizamanazi.

35 Sun kiztawane, Pablone pan chihtikin mut kit wan iztakin Diosta aishtaish kiz kit kuara. 36 Suasne pan nailtawane, wanne wat kulat kit kuamizta. 37 Aune kanuara 276 awa wamanash. 38 Uspa kwashit aizpa kuarawane, uspane wan chara pippa pira kiakpinnara, kanua an isalmin pila kirinpa.



Awakas Pablokas pi ksukin putnamtu

Kanua pi unaintu

39 Kinmizkane, kanua kiwainmuruzne sun pil piankamara-chi. Ainki pi wankin izamtuasmin, uspane kanuara puijshiera, pi ksurakima. **40** Katsa uk kuhtit tittat kit pira taizninñara. Tailmu tikas puijmu tikas chihtara. Suasne inkwa nupaim pñ kanua pitkin panaara, kanua pi ksurakima imiznapa. **41** Paas pi wankin imtuasmin, kanua pi ayukta ksura tinta uz kira. Kanua pitmalne pi ksura naptit. Ichiwal. Tinta inkwa pamtu akwa, pine kanua pilmal azpianmizta.

42 Suasne suldaruruzne kuhtittuza piantashinara, pi kamtawara iamanpa. **43** Suldarura ininmikane, Julione, Pablora kiwainshira, imanpa. Katmizna ussa piantashitchi. Usne pi kamuruza an ñancha ininnara, pira taizanapa, pilta piannaanapa. **44** Kwiztane mamaztuza ininnara, tapilara ianapa, kanua pittira ianapa. Sunkana wanne pilta watmin pianaara.

Pablone Malta su pi paizkakin tu

28 **1** Pilta watmin purasmin, su pi paizkakinne Malta muntit piankamaiznash. **2** Malta sukin uzturuzne aumiza kwi-sha wat kiwainnara. Alu kimtu akwa, tih pamtu akwa, uspane katsa ñ usappat kit aumiza akwanara, ikulanapa. **3** Suasne Pablone si pul sak kit si pul ñnta kiainmizta. Sun kimtuasmin, ñ akwa kamtane siras puz kit Pablowa chihtikin kanta. **4** Malta su-

kin uzturuzne Pablowa chihtira kamta kan kirit izat kit mamazta mamazta minñat kit kaizara: “An ampune mamaz awara piantamashinai. Pi kwamasarakas, au diosne, nil muntitmikane, ussa uzninnasachi,” kizara.

5 Pablone kamtara ulpiana, ñnkin taiznapa. Ussa chinkas kitchi. 6 Wanne us kiparinazi minñamizta. Usne irinazi minñamizta. Kwisha tirizarawane, ussa chinkas kitchi izakane, uspane mamaz tuntu minñat kit Pablowa kaizamizta:

—Usne maza dios i, kizara.

7 Au piannatkin an pi paizka sukin mikwane sua uzta. Usne kashara paiña su mijara. Usne Publio muntit. Usne kutña payukima aumiza yal nammilat kit kwisha wat kiwainta. 8 Publiowa papihshne pitmukin imtu tuara, imukasakas piwikasakas. Pablone ussa izna ira. Diosta us akwa paikwatpane, ussa chihtikasa paat kit ussa kakulninta. 9 Sun kitpane, mamaz imturuzne sun pi paizka sukis ussa aara. Wanta kakulninnara. 10 Uspane aumiza wat minñat kit kwiztane au we aizpa wantain milaara. Mamasa kanuawara iamtuchasmin, uspane au we aizpa aumiza milaara.

Pablone Malta suras puz kit Roma pipulura piannamtu

11 Kutña mish paitawane, aune kanuara waat kit su pi paizkakis iaiznash. Alu kimizta akwa, an kanua an ñamin Alejandría pipuluras at kit sua mara. Sun kanua pitkin paas dios kizpukanain waj. An diosne Cástorkas Póluxkas muntit. 12 Siracusa kanua piannamkin pianarawane, aune kutña payukima maaiznash. 13 Suasne pimamin pilzat kit Regio pipulura pianaiznash. Tilawara inkwa suras pamizkane, aune paas payukanain Puteoli pipulura pianaiznash. 14 Suane aune minpazha Jesúsata piantuzkasa wanmalanash. Uspane aumiza yal nammilanara maza domingokima. Kwiztane Roma pipulura iaiznash. 15 Roma pipuluras izmuruzne au aamtu piankamat kit mimal aumiza wanmalnaara. Minpazha Apio pipulura muntitkin iara. Mamaztuzne kutña pitmu muntitkin iara. Pablone usparuza iznat kit Diosta aishtaish kizta. Usne kwisha wat kulta. 16 Roma pipulukin piannatpane, suldaru ininmikane, wan kuhtittuza kajchira chihkanara. Pablone suldaru ininmikasha paikwara, paimpa uzna. Sua maza suldarune ussa izta.

Pablone Roma p̄pulu uztuza Dios pit kainnamtu

17 Kutña payu pailtawane, Pablone Roma p̄pulus Judío awa ininturuza akwanpa ininnara. Wanmakkarawane, kaiznara:

—Añaruz, nawa mirain. Nane Judío awaruza chinkas kit-chish. Na au an ñancha kwal uztuza kwail kitchikas, Judío awaruzne Jerusalén p̄pulukin nawa pizat kit Romano ininturuza chihkaara. 18 Nawa m̄marawane, uspane nawa chihtshiar, na kwail kitchi akwa. Na kwail kitchikas, uspane nawa piantashiara. 19 Judío awa nawa chihtshiarachi akwa, nane Romano katsa mikwara ininnapa paikwarau, nawa iznapa, na kwail kirit aizpa kiznapa. Nane au awaruza kwail kiarit kiznamtuchish. 20 Katmizna, nane uruza akwanarau, uruza iz kit parananapa. Judío awaruzne Dios inintamikasha izshiat kit tirizamtu. Na Jesús pa kwinta kimtu akwa, mane nane cadena kuhtit tus.

21 Suasne Judío awaruzne kaizara:

—Aune Judea sura uzturuztas pinkih nuwa sappamanash. Judío aimpihsh tas piannamtuzne nuwa kwail kizarachi. 22 Aune nu mintu aizpa mishipuspas. Aune masas wanmakmuruzpa miat kit Jesús ta kanpamtuzpa piankamshimtumpas. Wan awane masas wanmakmuruzpa aliz kulamtu.

23 Suasne maza payu ussa izna naarawane, kwisha akwan awane Pablo tukin piannaara. Tilawain nashnakima Pablone usparuza Dios awaruza ininshinamtui kiz kit nil kainanara. Usne usparuza kamtanat kit us kaizta aizpa watcha i minninnashira. Usne Moisés kaizta aizpakas Dios pit kainnammtuz kaizta aizpakas kamtanara, Jesús ta piankamanapa. 24 Minpazha Pablo kaizta aizpa nijkulara. Anpane miarachi. 25 Usparuzpain Pablo kaizta aizpa nijkulamtuki akwa, iamizta. Suasne Pablone minpa pit kaiznara: “Dios pa Sinam Izpulne an ñancha kwalta watcha kainanara. Usne Isaías kainammikasha ka paninta:

26 ‘An awara it kit kaiznari:

Dios kainnammtuza miarakas, une piankamamanazi.

Uspa para aizpa izarakas, une nijkulamanazi.

27 An awa piankamashitchi akwa, usparuzpa kailne miasachikana parit,
usparuzpa kasune sippatitkana parit.

Katmizna nijkulashitchi akwa,
 miashitchi akwa, uspane piankamasachi.
 Uspane nawa kaiyamanazi,
 na usparuza watsat milnanapa.’”^j

28 Jamtuchasmin, Pablone kaiznara: “Mane une piankam kit mirain. Makis Diosne paiña pit Judío awachiruza ininamtu, usparuza watsat milnanapa. Uspane watcha ussa mianazi.” **29** (Pablo sun kiztawane, Judío awane iat kit usparuzpain tinta kwinta kiara.)

30 Pablone yal nampiz kit paiña yalta uzta. Paas añokima sua uz kit wan ussa iznamtuza napninnara. **31** Pablone Dios awaruza ininashimtui. Wanta kaiznat kit Anpat Jesucristowa kamtanara. Minminkas ussa pilchapuzarachi.

Pailti.

^j **28.27** Is 6.9-10